

তথ্য অধিকার আইন, ২০০৯ সংশোধন সংক্রান্ত ধারণাপত্র

ভূমিকা:

মানুষের অধিকারের ইতিহাস-সভ্যতার ইতিহাস। সভ্যতার উষালগ্ন থেকে মানুষ তার অধিকারের কথা বলে আসছে, অধিকারের জন্য লড়াই করে আসছে। সেই ৩০০০ বছর পূর্ব হতে সোলন, ড্রাকো, সক্রোটস, প্লেটো, এরিস্টটলের সময় হতে পণ্ডিত, জ্ঞানী ও দার্শনিক ব্যক্তির মানুসের অধিকারের কথা বলে এসেছেন। সেই ধারাবাহিকতায় হাজার বছর ধরে বিভিন্ন মনীষীরা মানুসের অধিকার প্রতিষ্ঠা করার প্রয়াস পেয়েছেন। সেজন্যই আমরা দেখি জন মিলস্, ডিডেরট, ভলটেরার, রুশো এবং আরও কত মনীষীরা মানুসের অধিকার প্রতিষ্ঠায় তাদের কলম দিয়ে লড়াই করে গেছেন।

এই অধিকার প্রতিষ্ঠার সংগ্রামে সব সময় একটা ক্রটি থেকে গিয়েছে। তা হলো, অধিকার খন্ডন বা অধিকার ভুলুষ্ঠিত করতে কারা ষড়যন্ত্র করতে তৎপর ছিল তা সব সময় জানা সম্ভব হতো না। মানুসের অধিকার কেড়ে নেওয়ার জন্য কারা কাজ করছে, কীভাবে করছে, কতটুকু করছে সে বিষয়টি অজানা থেকে যাচ্ছিল। সেজন্য, এই অধিকারের লড়াইটা বিশ শতক পর্যন্ত অনেকটাই অসম্পূর্ণ থেকে যাচ্ছিল। হাজার বছর ধরে মানুস অধিকারের জন্য লড়াই করছে, কিন্তু অধিকারটি কোন জায়গা হতে খন্ডন করা হচ্ছে বা বাধাগ্রস্ত করা হচ্ছে তা সবসময় মানুস জানতে পারতনা।

বিংশ শতাব্দীর শেষ ভাগে তথ্য প্রযুক্তির মহা জাগরণের মাধ্যমে মানুস সর্বপ্রথম সংশ্লিষ্ট তথ্য আহরণ সম্পর্কে জ্ঞান অর্জন করে। প্রযুক্তি এই তথ্য সরবরাহের পথে একটি অনুকূল অনুঘটক হয়ে দাড়ায়। তথ্য প্রবাহের মাধ্যমেই সারা বিশ্বের মানুস পৃথিবীর এ প্রান্ত হতে ও প্রান্ত পর্যন্ত কোথায় মানবাধিকার বিঘ্নিত বা লঙ্ঘিত হচ্ছে তা জানতে পারছে। এর ফলে, মানুসের অধিকারের জন্য মানুস লড়াই করতে পারছে, যাদের অধিকার ধ্বংস করার প্রয়াস নেওয়া হচ্ছে তাদের পাশে দাঁড়াতে পারছে। এখানেই তথ্য এবং তথ্য অধিকারের ভূমিকা। এটি একটি বিশাল ভূমিকা। প্রকৃত তথ্য মানুসের জানা না থাকলে অধিকার প্রতিষ্ঠা করা সম্ভব নয়। অধিকার প্রতিষ্ঠার জন্য বা অধিকার খর্ব বা ভুলুষ্ঠিত হওয়ার বিষয়টি জানার জন্য তথ্য প্রয়োজন। বিংশ শতাব্দীর শেষ এবং একবিংশ শতাব্দীর প্রারম্ভে তথ্য অধিকারের যে বিপ্লব সৃষ্টি হয়েছে তা মানুসকে প্রকৃত স্বাধিকার, মানুসের অধিকার বা মানুসের স্বাধীনতার দিকে পরিচালিত করছে। এখানেই আসে তথ্য অধিকার আইন এবং এই আইনের ভূমিকা ও কার্যকারিতা। এ কারণেই মানবাধিকার ও ব্যক্তি স্বাধীনতা অনেকটাই নির্ভর করে প্রকৃত তথ্যের উপর।

তথ্য অধিকারের সাথে তথ্যের অবাধ প্রবাহ এবং তথ্য প্রাপ্তির বিষয়টি ওতপ্রোতভাবে জড়িত। তথ্যের অধিকার মানবাধিকারের সার্বজনীন ঘোষণাপত্র, ১৯৪৮ এর ১৯ অনুচ্ছেদ এ জাতিসংঘ কর্তৃক স্বীকৃত একটি মানবাধিকার। ফলে, সুশাসন এবং গণতান্ত্রিক চর্চায় জনগণের তথ্য প্রাপ্তির অধিকার একটি উল্লেখযোগ্য অনুষ্টি হিসেবে বিশ্বের অধিকাংশ দেশে স্বীকৃতি লাভ করেছে। বিভিন্ন দেশ এই অধিকারকে বিভিন্ন নামে অভিহিত করে আইনী কাঠামোতে অন্তর্ভুক্ত করেছে। তাছাড়া, তথ্যের এই অবাধ প্রবাহ এবং তথ্য প্রাপ্তির বিষয় মানুষের দৈনন্দিন কর্মকাণ্ডেও একটি গুরুত্বপূর্ণ সূচক হিসেবে পরিচিতি লাভ করেছে।

রাষ্ট্র ব্যবস্থায় সরকার কর্তৃক গৃহীত বিভিন্ন কার্যক্রম সম্পর্কে জনগণকে অবহিত করার মাধ্যমে সরকারের স্বচ্ছতা, জবাবদিহিতা এবং দুর্নীতিমুক্ত রাষ্ট্র ব্যবস্থা নিশ্চিতসহ সুশাসনের ভিত্তিতে দেশ পরিচালনা ও নীতি নির্ধারণে জনগণের সম্পৃক্ততা বৃদ্ধি করে। আধুনিক বিশ্বের অন্যান্য রাষ্ট্রের মত গণপ্রজাতন্ত্রী বাংলাদেশের সংবিধানে চিন্তা ও বিবেকের স্বাধীনতা এবং বাক স্বাধীনতাকে মৌলিক অধিকার হিসেবে নিশ্চয়তা প্রদান করা হয়েছে। সংবিধানের অনুচ্ছেদ ৩৯(২) এ উল্লিখিত বিষয়াদি সাপেক্ষে প্রত্যেক নাগরিকের বাক ও ভাব প্রকাশের স্বাধীনতা রয়েছে। উক্ত অধিকারের সাথে তথ্য প্রাপ্তির অধিকারের একটি অন্তর্নিহিত সম্পর্ক রয়েছে। বিষয়টি আরও স্পষ্ট এবং জনগণের তথ্য প্রাপ্তির অধিকারকে সুনির্দিষ্ট, অর্থবহ ও কার্যকরী করার নিমিত্ত সরকার ২০০৯ সালে তথ্য অধিকার আইন প্রণয়ন করে।

তথ্য অধিকার আইন, ২০০৯ এর প্রস্তাবনায় উল্লেখ করা হয়েছে, তথ্যের অবাধ প্রবাহ এবং জনগণের তথ্য অধিকার নিশ্চিতকরণের নিমিত্ত আইনটি প্রণয়ন করা হয়েছে। উক্ত প্রস্তাবনায়, সংবিধানে স্বীকৃত চিন্তা, বিবেক ও বাক স্বাধীনতার মৌলিক অধিকারের সাথে তথ্য প্রাপ্তির অধিকারকে অবিচ্ছেদ্য অধিকার বিবেচনায় নিয়ে তথ্য অধিকার নিশ্চিত করার মাধ্যমে সরকারি, স্বায়ত্ত্বশাসিত ও সংবিধিবদ্ধ সংস্থা এবং সরকারি ও বিদেশী অর্থায়নে সৃষ্ট বা পরিচালিত বেসরকারী সংস্থার স্বচ্ছতা ও জবাবদিহিতা বৃদ্ধি, দুর্নীতি হ্রাস এবং সুশাসন প্রতিষ্ঠা পাবে মর্মে প্রত্যাশা জ্ঞাপন করা হয়েছে।

তথ্য অধিকার আইন, ২০০৯ এর সংক্ষিপ্ত বিবরণ:

উক্ত আইনে ৮টি অধ্যায় এবং ৩৭টি ধারা রয়েছে। তাছাড়া উক্ত আইনের উদ্দেশ্য পূরণকল্পে ১টি বিধিমালা এবং ৩টি প্রবিধানমালা প্রণয়ন করা হয়েছে। আইনটির উল্লেখযোগ্য বৈশিষ্ট্য সমূহ নিম্নরূপ:

- ১। জনগণের তথ্য প্রাপ্তির অধিকারকে স্বীকৃতি প্রদানের পাশাপাশি তথ্য প্রদানকারী কর্তৃপক্ষ কর্তৃক তথ্য সংরক্ষণের বিধান সাপেক্ষে তথ্য সরবরাহের বাধ্যবাধকতা নিশ্চিত করা হয়েছে।

- ২। সরকারি, স্বায়ত্বশাসিত ও সংবিধিবদ্ধ সংস্থা এবং সরকারি ও বিদেশী অর্থায়নে সৃষ্ট বা পরিচালিত বেসরকারী সংস্থার স্বপ্রনোদিত তথ্য প্রকাশ;
- ৩। তথ্য প্রদানের জন্য প্রত্যেক সংস্থায় তথ্য প্রদানের জন্য দায়িত্বপ্রাপ্ত কর্মকর্তা নিয়োগ;
- ৪। তথ্য প্রাপ্তির আবেদন প্রত্যাখ্যাত/অত্যাধিক বিলম্ব হলে সে বিষয়ে আপিল ও তথ্য কমিশনে অভিযোগ দায়ের করার মাধ্যমে তথ্য প্রাপ্তির অধিকার বাস্তবায়ন;
- ৫। তথ্য আইন বাস্তবায়নে একটি স্বাধীন তথ্য কমিশন প্রতিষ্ঠা;
- ৬। ব্যক্তিগত তথ্য প্রকাশের ক্ষেত্রে সীমাবদ্ধতা আরোপ;
- ৭। প্রকাশযোগ্য নয় এমন তথ্য সুনির্দিষ্ট করা;
- ৮। আইন প্রয়োগকারী সংস্থা, রাষ্ট্রীয় নিরাপত্তার কাজে নিয়োজিত সংস্থাকে তথ্য অধিকার আইনের বহির্ভূত রাখা।

তথ্য অধিকার আইন, ২০০৯ সংশোধনকল্পে আইন কমিশনের সুপারিশ:

তথ্য অধিকার আইন, ২০০৯ সরকারের আধুনিক ও সময়োপযোগী পদক্ষেপ। এই আইনের মাধ্যমে জনগণের তথ্য প্রাপ্তির অধিকারকে সর্বপ্রথম আইনী কাঠামোতে স্বীকৃতি প্রদান করা হয়েছে। তবে এই আইনের কিছু সীমাবদ্ধতা পরিলক্ষিত হয়েছে যা এই আইনের উদ্দেশ্য পূরণে ও প্রত্যাশিত ফল লাভে প্রতিবন্ধকতা হিসেবে কাজ করছে। আইনের এই সীমাবদ্ধতাসমূহকে প্রাধান্য দিয়ে আইনটিকে প্রায়োগিক করার ক্ষেত্রে আরও সমৃদ্ধ করার নিমিত্ত নিম্নোক্ত সুপারিশ করা হয়েছে।

১। কতিপয় সংজ্ঞা স্পষ্টীকরণ ও পরিবর্তন:

ক. বিদ্যমান আইনে আপীলের পরিবর্তে রিভিউ এর বিধান অন্তর্ভুক্ত করার সুপারিশ প্রদান করায় সংজ্ঞায় আপীল এর পরিবর্তে 'রিভিউ' শব্দ দ্বারা প্রতিস্থাপন যেতে পারে।

খ. প্রচলিত আইনে কর্মকর্তার সংজ্ঞায় উল্লেখ করা হয়েছে যে, 'কর্মকর্তা অর্থে কর্মচারীও অন্তর্ভুক্ত হইবে'। কিন্তু উক্ত সংজ্ঞায় কর্মকর্তা বলতে কী বোঝায় সে বিষয়ে কোন ব্যাখ্যা না থাকায় কর্মকর্তা এর সংজ্ঞাটিকে নিম্নরূপে আরও বিস্তৃত ও সুনির্দিষ্ট করা যেতে পারে:

“কর্মকর্তা” অর্থ সংশ্লিষ্ট প্রতিষ্ঠানের কর্মে বেতনাদিযুক্ত পদে অধিষ্ঠিত বা কর্মরত কোন ব্যক্তি এবং সেই অর্থে কর্মচারীও অন্তর্ভুক্ত হইবেন”

গ. তথ্যের সংজ্ঞাটি আরও বিস্তৃত করার নিমিত্ত বিদ্যমান সংজ্ঞায় উল্লিখিত বিষয়সমূহের সাথে “ঔষধ সংক্রান্ত তথ্য, রোগ নির্ণয় সংক্রান্ত পরীক্ষাগার, চিকিৎসা সংক্রান্ত সকল বিষয়” অন্তর্ভুক্ত করা যেতে পারে।

ঘ. তথ্য অধিকার সংজ্ঞায় আরও সুনির্দিষ্ট করার নিমিত্ত নিম্নোক্ত শর্ত সংযোজন করা যেতে পারে-

“তবে শর্ত থাকে যে, রোগ নির্ণয় ও চিকিৎসা সংক্রান্ত সকল তথ্য শুধুমাত্র রোগী বা তাহার অনুপস্থিতিতে তাহার স্বামী/স্ত্রী, পুত্র/কন্যা, পিতা-মাতা পাইতে অধিকারী হইবে।”

২। আইনের ভাষাগত, আইনগত ও করণিক ভুল নিরসন:

ক. বিদ্যমান আইনের ২(জ) নং উপ-ধারায় ‘আইনের তফসিল’ এর পরিবর্তে ‘আইনটির সহিত সংযুক্ত তফসিল’ শব্দসমূহ সংযোজন করা যেতে পারে।

খ. দ্বিতীয় অধ্যায়ের ৪ ধারা এর ১ম লাইনে ‘সাপেক্ষে,’ শব্দটির পর এবং ‘কর্তৃপক্ষের’ শব্দটির পূর্বে ‘যেকোন’ শব্দটি সংযোজন করা যেতে পারে।

গ. বিদ্যমান আইনের গর্ভে নির্দিষ্ট কোনো ধারা, উপধারা, দফা বা উপদফা উল্লেখের ক্ষেত্রে প্রথমে ধারা, উপধারা, দফা বা উপদফা এবং তারপরে সংখ্যায় উক্ত ধারা, উপধারা, দফা বা উপদফার ক্রম উল্লেখ করা হয়েছে। কিন্তু বাংলাদেশের সর্বোচ্চ আইন অর্থাৎ সংবিধানের বাংলা পাঠে কোনো অনুচ্ছেদ উল্লেখ করার ক্ষেত্রে প্রথমে সংখ্যায় অনুচ্ছেদের ক্রম উল্লেখ করা হয়েছে এবং এরপরে অনুচ্ছেদ শব্দটি ব্যবহৃত হয়েছে। যেমন: গণপ্রজাতন্ত্রী বাংলাদেশের সংবিধান এর ২৬(৩) অনুচ্ছেদে উল্লেখ আছে,

“(৩) সংবিধানের ১৪২ অনুচ্ছেদের অধীন প্রণীত সংশোধনের ক্ষেত্রে এই অনুচ্ছেদের কোন কিছুই প্রযোজ্য হইবে না।”

যদিও এর ইংরেজি ভাষ্য নিম্নরূপ;

“26. (3) Nothing in this article shall apply to any amendment of this Constitution made under **article 142.**”

একইভাবে সংবিধানের বাংলা পাঠ এর রীতি অনুসরণ করে প্রস্তাবিত সুপারিশে কোনো ধারা, উপধারা, দফা বা উপদফা উল্লেখ করার ক্ষেত্রে প্রথমে সংখ্যা বা ক্রম এবং এর পরে ধারা, উপধারা, দফা বা উপদফা শব্দগুলো ব্যবহার করা হয়েছে। উদাহরণস্বরূপ, ৬(২) উপ-ধারায় ‘উপ-ধারা (১)’ এর পরিবর্তে ‘(১) উপ-ধারা’ উল্লেখ করা হয়েছে।

ঘ. ৬(২) উপ-ধারায় ‘সহজলভ্যতা’ শব্দটির পর এবং ‘সঙ্কুচিত’ শব্দটির পূর্বে ‘**বাধাগ্রস্ত বা**’ শব্দসমূহ সংযোজন করা যেতে পারে।

ঙ. ৬(৩)(ক) উপ-ধারায় ‘দায়িত্ব’ শব্দের পর ‘এবং’ শব্দের পূর্বে ‘**ও কর্তব্য**’ শব্দসমূহ সংযোজন করা যেতে পারে।

চ. ৭(জ) উপ-ধারায় ‘ব্যক্তির’ শব্দের পর ‘ব্যক্তিগত’ শব্দের পূর্বে ‘**একান্ত**’ শব্দটি সংযোজন করা যেতে পারে।

ছ. ১১(৩) উপ-ধারা ‘কার্যালয়’ শব্দের পর এবং ‘ঢাকায়’ শব্দের পূর্বে ‘**বাংলাদেশের রাজধানী**’ শব্দসমূহ সংযোজন করা যেতে পারে।

৩। আইনের বিভিন্ন ধারা স্পষ্টীকরণ:

ক. দ্বিতীয় অধ্যায় ও তৃতীয় অধ্যায়ের মধ্যে সামঞ্জস্য সাধনের লক্ষ্যে কিছু পরিবর্তন সুপারিশ করা হয়েছে। বিদ্যমান আইনের তৃতীয় অধ্যায়ে দায়িত্বপ্রাপ্ত কর্মকর্তা শিরোনামযুক্ত ১০ ধারাটি সঠিক ক্রম বিন্যাসের লক্ষ্যে দ্বিতীয় অধ্যায়ের ৮ ধারায় স্থানান্তর করতঃ বর্তমান আইনের ৮ ধারাকে ৯ ধারা এবং ৯ ধারাকে ১০ ধারায় রূপান্তর করা যেতে পারে। উল্লেখ্য যে, দ্বিতীয় অধ্যায়টি ৭ ধারার পর সমাপ্ত করে ৮, ৯ ও ১০ ধারার সমন্বয়ে তৃতীয় অধ্যায় পুনর্গঠন করা যেতে পারে। একই কারণে দ্বিতীয় অধ্যায়ের শিরোনাম ‘**তথ্য অধিকার, তথ্য সংরক্ষণ ও প্রকাশ**’ মর্মে এবং তৃতীয় অধ্যায়ের শিরোনাম ‘**দায়িত্বপ্রাপ্ত কর্মকর্তা, তথ্য প্রাপ্তির অনুরোধ ও তথ্য প্রদান পদ্ধতি**’ মর্মে পরিবর্তন করা যেতে পারে।

খ. সাম্প্রতিক সময়ে মুঠোফোনের ব্যবহার বৃদ্ধি পাওয়ায় ৬(৩)(ঘ) ২য় লাইনের শেষ দিকে ‘ফ্যাক্স নম্বর,’ শব্দটির পরে ‘ও ই-মেইল ঠিকানা’ শব্দসমূহের পরিবর্তে ‘ই-মেইল ঠিকানা এবং দাপ্তরিক ও মুঠোফোন নম্বর’ শব্দসমূহ অন্তর্ভুক্ত করা যেতে পারে।

গ. ৬(৫) উপ-ধারায় শেষ লাইনে ‘উহার কপি’ শব্দের পর ‘মূল্যে’ শব্দের পূর্বে ‘নামমাত্র’ শব্দ বিয়োজন করে তদস্থলে ‘এতদসংক্রান্তে প্রবিধানমালা দ্বারা নির্ধারিত’ শব্দসমূহ সংযোজন করা যেতে পারে।

ঘ. ৬(৭) উপ-ধারায় ‘বিষয়াদি’ শব্দের পর এবং ‘মাধ্যমে’ শব্দের পূর্বে ‘প্রেস বিজ্ঞপ্তি, ইলেক্ট্রনিক’ শব্দসমূহ সংযোজন করা যেতে পারে।

ঙ. ৭(জ) উপ-ধারার প্রারম্ভে ‘কোন’ শব্দের পূর্বে ‘রাষ্ট্র বা সংস্থা বা প্রতিষ্ঠান এর স্বার্থ সংরক্ষিত নহে’ এবং ‘তথ্য’ শব্দের পরে এবং ‘প্রকাশের’ শব্দের পূর্বে ‘যাহা’ শব্দটি সংযোজন করা যেতে পারে।

চ. ৭(খ) উপ-ধারায় বিশেষ অধিকার শব্দসমূহ ব্যবহার করা হলেও কোন কোন অধিকার বিশেষ অধিকার হিসেবে বিবেচিত হবে তা স্পষ্টীকরণের নিমিত্ত ‘এইরূপ তথ্য;’ শব্দসমূহের পর ‘এইক্ষেত্রে, কোন অধিকার বিশেষ অধিকার হিসেবে আখ্যায়িত হইবে সেই বিষয়ে জাতীয় সংসদের স্পিকারের সিদ্ধান্তই চূড়ান্ত বলিয়া বিবেচিত হইবে;’ শব্দসমূহ সংযোজন করা যেতে পারে।

ছ. ৭ ধারায় ‘কতিপয় তথ্য প্রকাশ বা প্রদান বাধ্যতামূলক নয়’ শিরোনামে প্রদত্ত তালিকা আরও বিস্তৃত করার নিমিত্ত ৭(ন) উপ-ধারাকে ৭(প) উপ-ধারায় স্থানান্তর করে ৭(ধ) উপ-ধারার পর নিম্ন বর্ণিত ৭(ন) উপ-ধারা সংযোজন করা যেতে পারে-

“(ন) কোন রোগীর রোগ বা চিকিৎসা সংক্রান্ত কোন তথ্য; তবে আদালতের আদেশ বা ক্ষেত্রমতে তাহার স্বামী/ স্ত্রী, পুত্র/কন্যা বা পিতা/মাতা বা তাহাদের অনুপস্থিতিতে ভ্রাতা/ভগ্নির অনুমতি সাপেক্ষে উক্ত তথ্য প্রকাশ করা যাইবে।”

জ. গণপ্রজাতন্ত্রী বাংলাদেশ সংবিধানে তত্ত্বাবধায়ক সরকারের বিধান বাতিল হওয়ায় উপদেষ্টা পরিষদের আর কোন অস্তিত্ব নাই। ফলে, বিদ্যমান আইনে ৭(ন) উপ-ধারার ‘মন্ত্রিপরিষদ’ শব্দের পর ‘বা, ক্ষেত্রমত, উপদেষ্টা পরিষদের’ শব্দসমূহ বিয়োজন করতে হবে। একইভাবে

উক্ত উপ-ধারার ‘তবে শর্ত থাকে যে, মন্ত্রিপরিষদ’ শব্দ সমূহের পর ‘বা, ক্ষেত্রমত, উপদেষ্টা পরিষদের’ শব্দসমূহ বিয়োজন করতে হবে।

ঝ. বিদ্যমান আইনের ৭ ধারার অধীনে তথ্য প্রদান স্থগিত রাখার ক্ষেত্রে সংশ্লিষ্ট কর্তৃপক্ষ কর্তৃক তথ্য কমিশনের পূর্বানুমোদন গ্রহণের বিধান রয়েছে। কিন্তু উক্ত পূর্বানুমোদন গ্রহণের প্রক্রিয়া সম্পর্কে সুনির্দিষ্টভাবে উল্লেখ না থাকায় বিষয়টি স্পষ্টীকরণের নিমিত্ত ৭ ধারার শেষ লাইনে ‘পূর্বানুমোদন’ শব্দটির পর এবং ‘গ্রহণ’ শব্দটির পূর্বে ‘**লিখিতভাবে**’ শব্দটি সংযোজন করা যেতে পারে।

ঞ. বিদ্যমান আইনের ৮(১) উপ-ধারায় উল্লেখ করা হয়েছে যে কোন ব্যক্তি তথ্য প্রাপ্তির জন্য সংশ্লিষ্ট দায়িত্বপ্রাপ্ত কর্মকর্তার নিকট অনুরোধ করতে পারবেন। উল্লেখ্য, যেকোন প্রতিষ্ঠানের ক্ষেত্রেই প্রতিষ্ঠানের সাথে সম্পর্কিত গুরুত্বপূর্ণ যেকোন বিষয়াদি সম্পর্কে কর্তৃপক্ষের অবগতির প্রয়োজন অনস্বীকার্য। সে কারনেই গুরুত্বপূর্ণ আবেদনসমূহসহ অন্যান্য গুরুত্বপূর্ণ বিষয়াদি সাধারণত প্রতিষ্ঠান প্রধান বা কর্তৃপক্ষের বরাবরেই প্রেরণ করা হয়। এক্ষেত্রে তথ্য প্রাপ্তির অনুরোধও সরাসরি কর্তৃপক্ষের বরাবরে প্রেরণ করা অধিক যুক্তিযুক্ত হবে মর্মে প্রতীয়মান হয়, বিধায়, ৮(১) উপ-ধারাটি নিম্নরূপে প্রতিস্থাপন করা যেতে পারে।

“কোন ব্যক্তি এই আইনের অধীন তথ্য প্রাপ্তির জন্য সংশ্লিষ্ট কর্তৃপক্ষের নিকট তথ্য চাহিয়া লিখিতভাবে বা ইলেক্ট্রনিক মাধ্যম বা ই-মেইলে অনুরোধ করিতে পারিবেন। সংশ্লিষ্ট তথ্য প্রদান ইউনিটের প্রশাসনিক প্রধান উক্তরূপ অনুরোধ প্রাপ্তির ২৪ (চব্বিশ) ঘন্টা বা ১(এক) কার্যদিবসের মধ্যে উক্ত ইউনিটের জন্য নির্ধারিত দায়িত্বপ্রাপ্ত কর্মকর্তার নিকট উহা প্রেরণ করিবেন।”

ট. বর্তমানে মুঠোফোনের ব্যবহার বৃদ্ধি পাওয়ায় ৮ ধারার (২) উপ-ধারার (অ) দফায় ‘ফ্যাক্স নম্বর,’ শব্দটির পরে ‘এবং ই-মেইল ঠিকানা’ শব্দসমূহের পরিবর্তে ‘ই-মেইল ঠিকানা এবং দাপ্তরিক ও মুঠোফোন নম্বর’ শব্দসমূহ অন্তর্ভুক্ত করা যেতে পারে।

ঠ. বিদ্যমান আইনের ৯ ধারায় তথ্য প্রদান পদ্ধতি সম্পর্কে উল্লেখ করা হয়েছে। সংশ্লিষ্ট প্রতিষ্ঠান হতে কী কী তথ্য প্রদান করা হচ্ছে সে বিষয়ে কর্তৃপক্ষের অবগত হওয়ার আবশ্যিকতা থাকায় উক্ত ধারার (১০) উপ-ধারার শেষে নিম্নোক্ত শর্ত সংযোজন করা যেতে পারে-

“তবে শর্ত থাকে যে, অত্র ধারার অধীনে তথ্য সরবরাহ করিবার পূর্বে দায়িত্বপ্রাপ্ত কর্মকর্তা সংশ্লিষ্ট ইউনিটের প্রশাসনিক প্রধানকে অবহিত করিবেন।”

ড. বিদ্যমান আইনের ১০(১) উপ-ধারায় কর্তৃপক্ষের প্রত্যেক তথ্য প্রদান ইউনিটের জন্য একজন দায়িত্বপ্রাপ্ত কর্মকর্তা নিয়োগ করার বিষয়ে উল্লেখ করা হয়েছে। কিন্তু অনেক সময় সংশ্লিষ্ট ইউনিটে পর্যাপ্ত সংখ্যক কর্মকর্তা না থাকায় তথ্য প্রাপ্তির অনুরোধ দীর্ঘদিন অনিষ্পন্ন অবস্থায় পড়ে থাকে, যা তথ্য প্রাপ্তির ক্ষেত্রে একটি বিশাল অন্তরায়। এই সমস্যা দূরীকরণের লক্ষ্যে বিদ্যমান আইনের ১০(১) উপ-ধারার সাথে নিম্নোক্ত দফাটি সন্নিবেশ করা যেতে পারে-

“তবে প্রয়োজনীয় সংখ্যক কর্মকর্তার অভাবে সংশ্লিষ্ট তথ্য প্রদান ইউনিটে কর্মরত কোন কর্মকর্তাকে অতিরিক্ত দায়িত্ব হিসেবে অত্র ধারার অধীনে তথ্য সরবরাহ করিবার নিমিত্ত দায়িত্বপ্রাপ্ত কর্মকর্তা নিয়োগ করিবে।”

ঢ. বর্তমানে মুঠোফোনের ব্যবহার বৃদ্ধি পাওয়ায় ১০(৪) উপ-ধারার ২য় লাইনের ‘ফ্যাক্স নম্বর,’ শব্দটির পর ও উক্তরূপ শব্দটির পূর্বে ‘এবং ই-মেইল ঠিকানা’ শব্দসমূহের পরিবর্তে ‘দাপ্তরিক ও মুঠোফোন নম্বর এবং ই-মেইল ঠিকানা’ শব্দসমূহ অন্তর্ভুক্ত করা যেতে পারে।

ণ. বিদ্যমান আইনে সরবরাহকৃত তথ্য হইতে কোন ফৌজদারি অপরাধ প্রকাশিত হলে সে বিষয়ে তথ্য কমিশনের করণীয় সম্পর্কে উল্লেখ না থাকায় এ সংক্রান্ত তথ্য কমিশন আইনের ১৩(৫) উপ-ধারার (ত) দফার পর নিম্নোক্ত দফা সংযোজন করা যেতে পারে-

“(থ) সরবরাহকৃত তথ্য হইতে কোন ফৌজদারি অপরাধ প্রকাশ পাইলে তথ্য কমিশন বিষয়টি সংশ্লিষ্ট মন্ত্রণালয়, তথ্য মন্ত্রণালয় ও আইন প্রয়োগকারী সংস্থাকে অবহিত করিবেন।”

ত. সংবিধানের ত্রয়োদশ সংশোধনী মামলা হিসেবে খ্যাত আব্দুল মান্নান খান বনাম সরকার ও অন্যান্য (সিভিল আপীল নং ১৩৯/২০০৫ ও সিভিল পিটিশন ফর লিভ টু আপীল ৫৯৬/৫৯৬) মামলায় বাংলাদেশ সুপ্রীম কোর্টের আপীল বিভাগ এই পর্যবেক্ষণ প্রদান করে যে, যতদূর সম্ভব প্রশাসনিক বিষয়াদি হতে বিচারককে বিযুক্ত রাখা সমীচিন। এই বিষয়টি বিবেচনায় বাছাই কমিটি হতে “প্রধান বিচারপতি কর্তৃক মনোনীত আপীল বিভাগের বিচারপতি” কে বাদ দিয়ে তাঁর পরিবর্তে জাতীয় সংসদের স্পীকারকে বাছাই কমিটির সভাপতি করা যেতে পারে। এছাড়াও, বাছাই কমিটিতে গণপ্রজাতন্ত্রী বাংলাদেশ সরকারের তথ্য মন্ত্রণালয়ের দায়িত্বপ্রাপ্ত

মন্ত্রী, তথ্য সচিব, গণপ্রজাতন্ত্রী বাংলাদেশ সরকার এবং সরকার কর্তৃক মনোনীত সুশীল সমাজের একজন প্রতিনিধিকে রাখা যেতে পারে। বিধায়, বিদ্যমান তথ্য অধিকার আইনের ১৪ ধারায় বর্ণিত বাছাই কমিটি নিম্নরূপে পূর্ণগঠন করা যেতে পারে-

- (ক) জাতীয় সংসদের স্পীকার, যিনি উহার সভাপতিও হইবেন;
- (খ) গণপ্রজাতন্ত্রী বাংলাদেশ সরকারের তথ্য মন্ত্রণালয়ের দায়িত্বপ্রাপ্ত মন্ত্রী;
- (গ) মন্ত্রিপরিষদ সচিব, গণপ্রজাতন্ত্রী বাংলাদেশ সরকার;
- (ঘ) তথ্য সচিব, গণপ্রজাতন্ত্রী বাংলাদেশ সরকার;
- (ঙ) সংসদ কার্যকর থাকাকালীন অবস্থায় স্পীকার কর্তৃক মনোনীত সরকারি দলের একজন এবং বিরোধী দলের একজন সংসদ সদস্য;
- (চ) সম্পাদকের যোগ্যতা সম্পন্ন সাংবাদিকতা পেশায় নিয়োজিত এমন অথবা গণমাধ্যমের সহিত সম্পর্কিত সমাজের বিশিষ্ট নাগরিকগণের মধ্য হইতে সরকার কর্তৃক মনোনীত একজন প্রতিনিধি;
- (ছ) সরকার কর্তৃক মনোনীত সুশীল সমাজের একজন প্রতিনিধি।

খ. বিদ্যমান আইনের ১৫(২) উপ-ধারায় প্রধান তথ্য কমিশনার ও তথ্য কমিশনার নিয়োগের ক্ষেত্রে ৬৭ (সাতষট্টি) বছর অপেক্ষা অধিক বয়সের ব্যক্তি উক্ত পদে নিয়োগের জন্য যোগ্য হবেন না মর্মে উল্লেখ করা হয়েছে। কিন্তু এ ধরনের পদে নিয়োগের ক্ষেত্রে বয়সের কোন সীমা থাকা উচিত নয়। কারণ, উক্ত পদে নিয়োগ লাভের জন্য শারীরিক ও মানসিক সক্ষমতা ব্যতীত অন্য কোন বিষয় বাধা হতে পারেনা। এর ফলে, অধিকতর যোগ্য ব্যক্তিকে উক্ত পদে নিয়োগের সুযোগ বাধাগ্রস্ত হচ্ছে। এই বিবেচনায় উক্ত ১৫(২) উপ-ধারার বিধান বিয়োজন করা যেতে পারে।

দ. ১৫(৩) উপ-ধারায় প্রধান তথ্য কমিশনার ও তথ্য কমিশনারগণ নিয়োগ লাভের তারিখ হতে ৫(পাঁচ) বৎসর কিংবা ৬৭(সাতষট্টি) বৎসর বয়স পূর্ণ হওয়া পর্যন্ত, যেটি আগে হয়, স্বীয় পদে বহাল থাকবেন মর্মে উল্লেখ আছে। উল্লেখ্য, ইতোপূর্বেই ৬৭ (সাতষট্টি) বছর বয়সের বাধাটি বিয়োজনের সুপারিশ প্রদান করা হয়েছে। এছাড়াও, ৫(পাঁচ) বছর দীর্ঘসময় হওয়ায় ধারাটিতে উল্লিখিত কার্যকাল নিম্নরূপে সংশোধন করা যেতে পারে-

“প্রধান তথ্য কমিশনার ও তথ্য কমিশনারগণ নিয়োগ লাভের তারিখ হইতে ৩ (তিন) বৎসর পূর্ণ হওয়া পর্যন্ত স্বীয় পদে বহাল থাকিবেন।”

খ. এছাড়া বিদ্যমান আইনের ১৫(৪) উপ-ধারা প্রধান তথ্য কমিশনারের ক্ষেত্রে পুনরায় নিয়োগ বারিত করা হয়েছে। কিন্তু এর ফলে অধিকতর দক্ষ, অভিজ্ঞ ও যোগ্য ব্যক্তির সেবা প্রাপ্তিতে বাধা সৃষ্টি হতে পারে। এছাড়া, যেহেতু প্রধান তথ্য কমিশনার ও তথ্য কমিশনারগণ হিসেবে নিয়োগ প্রাপ্তির ক্ষেত্রে ৬৭ (সাতষট্টি) বছর বয়সের বাধাটি বিয়োজনের সুপারিশ প্রদান করা হয়েছে এবং যেহেতু প্রধান তথ্য কমিশনার ও তথ্য কমিশনারগণের মেয়াদ ৫ (পাঁচ) বছর হতে কমিয়ে ৩ (তিন) বছর করার জন্য সুপারিশ প্রদান করা হয়েছে, সেহেতু অধিকতর দক্ষ, অভিজ্ঞ ও যোগ্য ব্যক্তির সেবা দীর্ঘসময় প্রাপ্তির ক্ষেত্রে সৃষ্ট বাধা অপসারণের নিমিত্ত উল্লিখিত ধারাটি নিম্নরূপে সংশোধন করা যেতে পারে-

“প্রধান তথ্য কমিশনার এবং তথ্য কমিশনারগণ একই পদে পুনরায় নিয়োগ লাভের অযোগ্য হইবেন না এবং কোন তথ্য কমিশনার প্রধান তথ্য কমিশনার পদে নিয়োগ লাভের অযোগ্য হইবেন না।”

ন. তথ্য প্রদানের অনুরোধ প্রাপ্তির পর দায়িত্বপ্রাপ্ত কর্মকর্তা তথ্য অধিকার আইন, ২০০৯ এর ৯(১), (২) ও (৩) ধারাসমূহে উল্লিখিত নির্দিষ্ট সময়সীমার মধ্যে তথ্য প্রদানে বাধ্য এবং উক্ত সময়সীমার মধ্যে দায়িত্বপ্রাপ্ত কর্মকর্তা তথ্য প্রদান করতে ব্যর্থ হলে তথ্য প্রাপ্তির অনুরোধ প্রত্যাখ্যান করা হয়েছে বলে গণ্য হবে। আবার, কোন ব্যক্তি ৯(১), (২) ও (৩) ধারাসমূহে উল্লিখিত নির্দিষ্ট সময়সীমার মধ্যে তথ্য লাভে ব্যর্থ হলে বা দায়িত্বপ্রাপ্ত কর্মকর্তার কোন সিদ্ধান্ত দ্বারা সংক্ষুব্ধ হলে তথ্য অধিকার আইন, ২০০৯ এর ২৪ ধারার অধীনে আপীল কর্তৃপক্ষের নিকট আপীল করতে পারবেন মর্মে উল্লেখ আছে। আইনটির ২(ক) ধারায় উল্লেখ আছে,

“আপীল কর্তৃপক্ষ” অর্থ --

(অ) কোন তথ্য প্রদান ইউনিটের ক্ষেত্রে উক্ত ইউনিটের অব্যবহিত উর্ধ্বতন কার্যালয়ের প্রশাসনিক প্রধান; অথবা

(আ) কোন তথ্য প্রদান ইউনিটের উর্ধ্বতন কার্যালয় না থাকলে, উক্ত তথ্য প্রদান ইউনিটের প্রশাসনিক প্রধান।”

আবার, ধারা ১৩ (১)(ক) ও (খ) তে বলা আছে কোন তথ্য চাহিদা প্রত্যাখ্যাত হলে এবং তথ্যের অনুরোধ প্রাপ্তির পর আইনে উল্লেখিত নির্দিষ্ট সময়ের মধ্যে তথ্য প্রদান করা না হলে তথ্য কমিশনে অভিযোগ দায়ের করা যাবে এবং তথ্য কমিশন উক্ত অভিযোগ গ্রহণ, উহার অনুসন্ধান ও নিষ্পত্তি করতে পারবে। অর্থাৎ একই বিষয়ে আপীল কর্তৃপক্ষের ও তথ্য

কমিশনের যুগপৎ এখতিয়ার (Concurrent Jurisdiction) রয়েছে। ফলে আপীল কর্তৃপক্ষ ও তথ্য কমিশন একই বলে অনেকে ভুল ধারণা পোষণ করে, যা অযথা জটিলতা সৃষ্টি করেছে। এছাড়া, ২৫ ধারায় বলা আছে কোন ব্যক্তি আপীল কর্তৃপক্ষের সিদ্ধান্ত দ্বারা সংক্ষুব্ধ হলেও তথ্য কমিশনে অভিযোগ দায়ের করতে পারবে। ফলে, তথ্য প্রাপ্তির ক্ষেত্রে অনাবশ্যিক দীর্ঘসূত্রিতা সৃষ্টি হয়।

আরো উল্লেখ্য, প্রতিষ্ঠানের দায়িত্বপ্রাপ্ত কর্মকর্তা তার প্রশাসনিক প্রধানের অধিনস্থ ও নিয়ন্ত্রনাধীন। কিন্তু বিদ্যমান আইনানুযায়ী দায়িত্বপ্রাপ্ত কর্মকর্তার আদেশ দ্বারা সংক্ষুব্ধ ব্যক্তিকে ঐ একই প্রতিষ্ঠানের প্রশাসনিক প্রধানের নিকট আপীল দায়ের করতে হয়। এ যেন কোন ব্যক্তির নিজের আদেশের বিরুদ্ধে তার নিজের কাছেই (Ceaser to Ceaser) আপীল করা, যা কোনভাবেই যুক্তিযুক্ত নয়। বিধায়, আপীলের এই বিধানটি বাদ দেওয়া যেতে পারে।

তবে, স্থানীয় প্রতিকার হিসেবে প্রতিষ্ঠানের প্রশাসনিক প্রধানের নিকট “রিভিউ” এর ক্ষমতা অর্পণ করা যেতে পারে। এ বিষয়সমূহ বিবেচনায় নিয়ে বিদ্যমান আইনের আপীলের বিধানযুক্ত ২৪ ধারা নিম্নরূপে পুনর্গঠন করা যেতে পারে-

২৪। রিভিউ নিষ্পত্তি, ইত্যাদি।—(১) কোন ব্যক্তি ধারা ৯ এর উপ-ধারা (১), (২) বা (৪) এ নির্ধারিত সময়সীমার মধ্যে তথ্য লাভে ব্যর্থ হইলে কিংবা দায়িত্বপ্রাপ্ত কর্মকর্তার কোন সিদ্ধান্তে সংক্ষুব্ধ হইলে উক্ত সময়সীমা অতিক্রান্ত হইবার, বা ক্ষেত্রমত, সিদ্ধান্ত লাভ করিবার পরবর্তী ৩০ (ত্রিশ) কাযদিবসের মধ্যে রিভিউ কর্তৃপক্ষের নিকট রিভিউ করিতে পারিবেন।

(২) রিভিউ কর্তৃপক্ষ যদি এই মর্মে সন্তুষ্ট হন যে, রিভিউকারী যুক্তিসংগত কারণে উপ-ধারা (১) এ নির্দিষ্ট সময়সীমার মধ্যে রিভিউ দায়ের করিতে পারেন নাই, তাহা হইলে তিনি উক্ত সময়সীমা অতিবাহিত হওয়ার পরবর্তী ১৫ কাযদিবসের মধ্যে রিভিউ আবেদন গ্রহণ করিতে পারিবেন।

(৩) রিভিউ কর্তৃপক্ষ উপ-ধারা (১) বা (২) এর অধীন রিভিউ আবেদন প্রাপ্তির পরবর্তী ১৫ (পনের) কাযদিবসের মধ্যে—

(ক) রিভিউ আবেদনকারীকে অনুরোধকৃত তথ্য সরবরাহের জন্য সংশ্লিষ্ট দায়িত্বপ্রাপ্ত কর্মকর্তাকে নির্দেশ প্রদান করিবেন; অথবা

(খ) তদ্বিবেচনায় গ্রহণযোগ্য না হইলে রিভিউ আবেদনটি খারিজ করিয়া দিবেন।

(৪) উপ-ধারা (৩) এর অধীন তথ্য প্রদানের জন্য নির্দেশিত হইলে, দায়িত্বপ্রাপ্ত কর্মকর্তা উক্তরূপ নির্দেশ প্রাপ্তির তারিখ হইতে ধারা ৯ এর, ক্ষেত্রমত, উপ-ধারা (১), (২) বা (৪) এ নির্ধারিত সময়সীমার মধ্যে রিভিউ আবেদনকারীকে অনুরোধকৃত তথ্য সরবরাহ করিবেন।

প. তথ্য অধিকার আইনের ২৫(৩) ধারায় (২) উপধারায় বর্ণিত সময়সীমার মধ্যে অভিযোগ দায়ের করতে ব্যর্থ হলেও যুক্তিসংগত কারণে কমিশন কর্তৃক অভিযোগ গ্রহণ সংক্রান্তে বিধান রাখা হলেও এক্ষেত্রে কোন সময় সীমা উল্লেখ নাই। এ বিষয়ে পরবর্তী ১৫ কাযদিবসের সীমা নির্ধারণ করে উক্ত উপ-ধারা নিম্নরূপে সংশোধন করা যেতে পারে-

“তথ্য কমিশন যদি এই মর্মে সন্তুষ্ট হন যে, অভিযোগকারী যুক্তিসংগত কারণে উপ-ধারা (২) এ নির্দিষ্ট সময়সীমার মধ্যে অভিযোগ দায়ের করিতে পারেন নাই, তাহা হইলে তথ্য কমিশন উক্ত সময়সীমা অতিবাহিত হওয়ার পরবর্তী ১৫ (পনের) কাযদিবসের মধ্যে অভিযোগ গ্রহণ করিতে পারিবেন।”

ফ. বিদ্যমান আইনের ২৭(১) উপ-ধারায় জবাবদিহিতা নিশ্চিত করার নিমিত্ত দায়িত্বপ্রাপ্ত কর্মকর্তার বিরুদ্ধে জরিমানার বিধান রাখা হয়েছে। তবে, দায়িত্বপ্রাপ্ত কর্মকর্তা যদি সংশ্লিষ্ট ইউনিটের প্রশাসনিক প্রধান এর কারণে তার দায়িত্বপালনে ব্যর্থ হন সেক্ষেত্রে তথ্য প্রদান ইউনিটের প্রশাসনিক প্রধানকেও এই ধারার অধীন জবাবদিহিতার আওতায় আনা আবশ্যিক। ফলে ২৭ ধারায় ‘দায়িত্বপ্রাপ্ত কর্মকর্তা’ শব্দসমূহের পর ‘ক্ষেত্রমতে সংশ্লিষ্ট তথ্য প্রদান ইউনিটের প্রশাসনিক প্রধান’ শব্দসমূহ সংযোজন করা যেতে পারে।

ব. বিদ্যমান আইনের ২৭(১) ধারায় উল্লিখিত দৈনিক জরিমানার হার ‘৫০ (পঞ্চাশ)’ এর স্থলে ‘২০০ (দুইশত)’ এবং সর্বোচ্চ জরিমানার পরিমাণ ‘৫০০০ (পাঁচ হাজার)’ এর স্থলে ‘২৫,০০০ (পঁচিশ হাজার)’ করা যেতে পারে।

ভ. বিদ্যমান আইনের যেসকল ধারা ও উপ-ধারায় ‘আপীল’ শব্দটি রয়েছে সেখানে ‘আপীল’ শব্দটি ‘রিভিউ’ শব্দ দ্বারা প্রতিস্থাপন করা যেতে পারে।

ম. বিদ্যমান আইনের যেসকল ধারা ও উপ-ধারায় ‘দিন’ শব্দটি রয়েছে সেখানে ‘দিন’ শব্দটি ‘কাযদিবস’ শব্দ দ্বারা প্রতিস্থাপন করা যেতে পারে।

উপসংহার:

তথ্য অধিকার আইন, ২০০৯ সরকারের একটি যুগান্তকারী পদক্ষেপ এবং সংবিধানে উল্লিখিত বাক স্বাধীনতা ও চিন্তার স্বাধীনতার অধিকারের সাথে সম্পর্কযুক্ত। বিগত ১৫ বছরে আইনটির বাস্তবায়নে প্রায়োগিক কিছু বাধা পরিলক্ষিত হওয়ায় আইনটি যুগোপযোগী করা আবশ্যিক। এর ধারাবাহিকতায় বিদ্যমান আইনে থাকা বিভিন্ন বিষয়ে অস্পষ্টতা দূরীভূত হলে আইনটি দেশের প্রান্তিক জনগণের তথ্যের অধিকারকে নিশ্চিত করতে বিশেষ ভূমিকা রাখতে সক্ষম হবে এবং একইসাথে সরকারি/বেসরকারি সেবার মান বৃদ্ধিসহ সরকারের স্বচ্ছতা ও জবাবদিহিতা আরও গতিশীলতা লাভ করবে। তবেই গণপ্রজাতন্ত্রী বাংলাদেশ সংবিধানের ৭ অনুচ্ছেদে বর্ণিত ‘প্রজাতন্ত্রের সকল ক্ষমতার মালিক জনগণ’ এর প্রকৃত বাস্তবায়ন নিশ্চিত করা সম্ভব হবে।

স্বাক্ষরিত /- ১৬.০৫.২০২৪

বিচারপতি এ.টি.এম. ফজলে কবীর

সদস্য

আইন কমিশন

স্বাক্ষরিত /- ১৬.০৫.২০২৪

বিচারপতি আবু বকর সিদ্দিকী

সদস্য

আইন কমিশন

স্বাক্ষরিত /- ১৬.০৫.২০২৪

বিচারপতি এ.বি.এম. খায়রুল

হক

চেয়ারম্যান

আইন কমিশন

প্রস্তাবিত সংশোধনসহ তথ্য অধিকার আইন, ২০০৯

২০০৯ সনের ২০ নং আইন

তথ্যের অবাধ প্রবাহ এবং জনগণের তথ্য অধিকার নিশ্চিতকরণের নিমিত্ত বিধান করিবার লক্ষ্যে
প্রণীত আইন।

যেহেতু গণপ্রজাতন্ত্রী বাংলাদেশের সংবিধানে চিন্তা, বিবেক ও বাক-স্বাধীনতা নাগরিকগণের অন্যতম মৌলিক অধিকার হিসাবে স্বীকৃত এবং তথ্য প্রাপ্তির অধিকার চিন্তা, বিবেক ও বাক-স্বাধীনতার একটি অবিচ্ছেদ্য অংশ; এবং

যেহেতু জনগণ প্রজাতন্ত্রের সকল ক্ষমতার মালিক ও জনগণের ক্ষমতায়নের জন্য তথ্য অধিকার নিশ্চিত করা অত্যাবশ্যিক; এবং

যেহেতু জনগণের তথ্য অধিকার নিশ্চিত করা হইলে সরকারী, স্বায়ত্তশাসিত ও সংবিধিবদ্ধ সংস্থা এবং সরকারী ও বিদেশী অর্থায়নে সৃষ্ট বা পরিচালিত বেসরকারী সংস্থার স্বচ্ছতা ও জবাবদিহিতা বৃদ্ধি পাইবে, দুর্নীতি হ্রাস পাইবে ও সুশাসন প্রতিষ্ঠিত হইবে; এবং

যেহেতু সরকারী, স্বায়ত্তশাসিত ও সংবিধিবদ্ধ সংস্থা এবং সরকারী ও বিদেশী অর্থায়নে সৃষ্ট বা পরিচালিত বেসরকারী সংস্থার স্বচ্ছতা ও জবাবদিহিতা নিশ্চিতকরণের লক্ষ্যে বিধান করা সমীচীন ও প্রয়োজনীয়;

সেহেতু এতদ্বারা নিম্নরূপ আইন করা হইলঃ—

প্রথম অধ্যায়

প্রারম্ভিক

১। সংক্ষিপ্ত শিরোনাম ও প্রবর্তন।—(১) এই আইন তথ্য অধিকার আইন, ২০০৯ নামে অভিহিত হইবে।

(২) এই আইনের —

(ক) ধারা ৮, ২৪ এবং ২৫ ব্যতিত অন্যান্য ধারা ২০ অক্টোবর, ২০০৮ তারিখে কার্যকর হইয়াছে বলিয়া গণ্য হইবে; এবং

(খ) ৮, ২৪ এবং ২৫ ধারা ১লা জুলাই, ২০০৯ তারিখ হইতে কার্যকর হইবে।

২। সংজ্ঞা।—বিষয় বা প্রসঙ্গের পরিপন্থী না হইলে, এই আইনে —

(ক) “**রিভিউ কর্তৃপক্ষ**” অর্থ —

(অ) কোন তথ্য প্রদান ইউনিটের ক্ষেত্রে উক্ত ইউনিটের অব্যবহিত উর্ধ্বতন কার্যালয়ের প্রশাসনিক প্রধান; অথবা

(আ) কোন তথ্য প্রদান ইউনিটের উর্ধ্বতন কার্যালয় না থাকিলে, উক্ত তথ্য প্রদান ইউনিটের প্রশাসনিক প্রধান;

(খ) “**কর্তৃপক্ষ**” অর্থ —

(অ) গণপ্রজাতন্ত্রী বাংলাদেশের সংবিধান অনুযায়ী সৃষ্ট কোন সংস্থা;

(আ) গণপ্রজাতন্ত্রী বাংলাদেশের সংবিধানের ৫৫(৬) অনুচ্ছেদের অধীন প্রণীত কার্য বিধিমালার অধীন গঠিত সরকারের কোন মন্ত্রণালয়, বিভাগ বা কার্যালয়;

(ই) কোন আইন দ্বারা বা উহার অধীন গঠিত কোন সংবিধিবদ্ধ সংস্থা বা প্রতিষ্ঠান;

(ঈ) সরকারী অর্থায়নে পরিচালিত বা সরকারী তহবিল হইতে সাহায্যপুষ্ট কোন বেসরকারী সংস্থা বা প্রতিষ্ঠান;

(উ) বিদেশী সাহায্যপুষ্ট কোন বেসরকারী সংস্থা বা প্রতিষ্ঠান;

(উ) সরকারের পক্ষে অথবা সরকার বা সরকারী কোন সংস্থা বা প্রতিষ্ঠানের সহিত সম্পাদিত চুক্তি মোতাবেক সরকারী কার্যক্রম পরিচালনার দায়িত্বপ্রাপ্ত কোন বেসরকারী সংস্থা বা প্রতিষ্ঠান; বা

(ঋ) সরকার কর্তৃক, সময় সময়, সরকারী গেজেটে প্রজ্ঞাপন দ্বারা নির্ধারিত অন্য কোন সংস্থা বা প্রতিষ্ঠান;

(গ) “কর্মকর্তা” অর্থ সংশ্লিষ্ট প্রতিষ্ঠানের কর্মে বেতনাদিযুক্ত পদে অধিষ্ঠিত বা কর্মরত কোন ব্যক্তি এবং সেই অর্থে কর্মচারীও অন্তর্ভুক্ত হইবেন;

(ঘ) “তথ্য প্রদান ইউনিট” অর্থ—

(অ) সরকারের কোন মন্ত্রণালয়, বিভাগ বা কার্যালয়ের সহিত সংযুক্ত বা অধীনস্থ কোন অধিদপ্তর, পরিদপ্তর বা দপ্তরের প্রধান কার্যালয়, বিভাগীয় কার্যালয়, আঞ্চলিক কার্যালয়, জেলা কার্যালয় বা উপজেলা কার্যালয়;

(আ) কর্তৃপক্ষের প্রধান কার্যালয়, বিভাগীয় কার্যালয়, আঞ্চলিক কার্যালয়, জেলা কার্যালয় বা উপজেলা কার্যালয়;

(ঙ) “তথ্য কমিশন” অর্থ ধারা ১১ এর অধীন প্রতিষ্ঠিত তথ্য কমিশন;

(চ) “তথ্য” অর্থে কোন কর্তৃপক্ষের গঠন, কাঠামো ও দাপ্তরিক কর্মকাণ্ড সংক্রান্ত যে কোন স্মারক, বই, নকশা, মানচিত্র, চুক্তি, তথ্য-উপাত্ত, লগ বই, আদেশ, বিজ্ঞপ্তি, দলিল, নমুনা, পত্র, প্রতিবেদন, হিসাব বিবরণী, ঔষধ সংক্রান্ত তথ্য, রোগ নির্ণয় সংক্রান্ত পরীক্ষাগার, চিকিৎসা সংক্রান্ত সকল বিষয়, প্রকল্প প্রস্তাব, আলোকচিত্র, অডিও, ভিডিও, অংকিতচিত্র, ফিল্ম, ইলেকট্রনিক প্রক্রিয়ায় প্রস্তুতকৃত যে কোন ইনস্ট্রুমেন্ট, যান্ত্রিকভাবে পাঠযোগ্য দলিলাদি এবং ভৌতিক গঠন ও বৈশিষ্ট্য নির্বিশেষে অন্য যে কোন তথ্যবহ বস্তু বা উহাদের প্রতিলিপিও ইহার অন্তর্ভুক্ত হইবে;

তবে শর্ত থাকে যে, দাপ্তরিক নোট সিট বা নোট সিটের প্রতিলিপি ইহার অন্তর্ভুক্ত হইবে না;

(ছ) “তথ্য অধিকার” অর্থ কোন কর্তৃপক্ষের নিকট হইতে তথ্য প্রাপ্তির অধিকার;

তবে শর্ত থাকে যে, রোগ নির্ণয় ও চিকিৎসা সংক্রান্ত সকল তথ্য শুধুমাত্র রোগী বা তাহার অনুপস্থিতিতে তাহার স্বামী/স্ত্রী, পিতা-মাতা, পুত্র/কন্যা পাইতে অধিকারী হইবে;

(জ) “তফসিল” অর্থ এই আইনটির সহিত সংযুক্ত তফসিল;

(ঝ) “তৃতীয় পক্ষ” অর্থ তথ্য প্রাপ্তির জন্য অনুরোধকারী বা তথ্য প্রদানকারী কর্তৃপক্ষ ব্যতীত অনুরোধকৃত তথ্যের সহিত জড়িত অন্য কোন পক্ষ;

(ঞ) “দায়িত্বপ্রাপ্ত কর্মকর্তা” অর্থ ধারা ১০ এর অধীন নিযুক্ত কর্মকর্তা;

(ট) “নির্ধারিত” অর্থ বিধি বা প্রবিধান দ্বারা নির্ধারিত;

(ঠ) “প্রবিধান” অর্থ ধারা ৩৪ এর অধীন প্রণীত কোন প্রবিধান;

(ড) “বাছাই কমিটি” অর্থ ধারা ১৪ এর অধীন গঠিত বাছাই কমিটি;

(ঢ) “বিধি” অর্থ ধারা ৩৩ এর অধীন প্রণীত কোন বিধি।

৩। আইনের প্রাধান্য।—প্রচলিত অন্য কোন আইনের—

(ক) তথ্য প্রদান সংক্রান্ত বিধানাবলী এই আইনের বিধানাবলী দ্বারা ক্ষুণ্ণ হইবে না; এবং

(খ) তথ্য প্রদানে বাধা সংক্রান্ত বিধানাবলী এই আইনের বিধানাবলীর সহিত সাংঘর্ষিক হইলে, এই আইনের বিধানাবলী প্রাধান্য পাইবে।

দ্বিতীয় অধ্যায়

তথ্য অধিকার, তথ্য সংরক্ষণ ও প্রকাশ

৪। তথ্য অধিকার।—এই আইনের বিধানাবলী সাপেক্ষে, যেকোন কর্তৃপক্ষের নিকট হইতে প্রত্যেক নাগরিকের তথ্য লাভের অধিকার থাকিবে এবং কোন নাগরিকের অনুরোধের প্রেক্ষিতে সংশ্লিষ্ট কর্তৃপক্ষ তাহাকে তথ্য সরবরাহ করিতে বাধ্য থাকিবে।

৫। তথ্য সংরক্ষণ।—(১) এই আইনের অধীন তথ্য অধিকার নিশ্চিত করিবার লক্ষ্যে প্রত্যেক কর্তৃপক্ষ উহার যাবতীয় তথ্যের ক্যাটালগ এবং ইনডেক্স প্রস্তুত করিয়া যাথাযথভাবে সংরক্ষণ করিবে।

(২) প্রত্যেক কর্তৃপক্ষ যেই সকল তথ্য কম্পিউটারে সংরক্ষণের উপযুক্ত বলিয়া মনে করিবে সেই সকল তথ্য, যুক্তিসংগত সময়সীমার মধ্যে, কম্পিউটারে সংরক্ষণ করিবে এবং তথ্য লাভের সুবিধার্থে সমগ্র দেশে নেটওয়ার্কের মাধ্যমে উহার সংযোগ স্থাপন করিবে।

(৩) তথ্য কমিশন, প্রবিধান দ্বারা, কর্তৃপক্ষ কর্তৃক তথ্য সংরক্ষণ ও ব্যবস্থাপনার জন্য অনুসরণীয় নির্দেশনা প্রদান করিবে এবং সকল কর্তৃপক্ষ উহা অনুসরণ করিবে।

৬। তথ্য প্রকাশ।—(১) প্রত্যেক কর্তৃপক্ষ উহার গৃহীত সিদ্ধান্ত, কার্যক্রম কিংবা সম্পাদিত বা প্রস্তাবিত কর্মকাণ্ডের সকল তথ্য নাগরিকগণের নিকট সহজলভ্য হয়, এইরূপে সূচিবদ্ধ করিয়া প্রকাশ ও প্রচার করিবে।

(২) (১) উপ-ধারার অধীন তথ্য প্রকাশ ও প্রচারের ক্ষেত্রে কোন কর্তৃপক্ষ কোন তথ্য গোপন করিতে বা উহার সহজলভ্যতাকে বাধাগ্রস্থ বা সঙ্কুচিত করিতে পারিবে না।

(৩) প্রত্যেক কর্তৃপক্ষ প্রতিবছর একটি প্রতিবেদন প্রকাশ করিবে যাহাতে নিম্নলিখিত তথ্যসমূহ অন্তর্ভুক্ত থাকিবে, যথাঃ—

(ক) কর্তৃপক্ষের সাংগঠনিক কাঠামোর বিবরণ, কার্যক্রম, কর্মকর্তা-কর্মচারীগণের দায়িত্ব ও কর্তব্য এবং সিদ্ধান্ত গ্রহণ পদ্ধতির বিবরণ বা পদ্ধতি;

(খ) কর্তৃপক্ষের সকল নিয়ম-কানুন, আইন, অধ্যাদেশ, বিধিমালা, প্রবিধানমালা, প্রজ্ঞাপন, নির্দেশনা, ম্যানুয়্যাল, ইত্যাদির তালিকাসহ উহার নিকট রক্ষিত তথ্যসমূহের শ্রেণীবিন্যাস;

(গ) কর্তৃপক্ষের নিকট হইতে কোন ব্যক্তি যে সকল শর্তে লাইসেন্স, পারমিট, অনুদান, বরাদ্দ, সম্মতি, অনুমোদন বা অন্য কোন প্রকার সুবিধা গ্রহণ করিতে পারিবেন উহার বিবরণ এবং উক্তরূপ শর্তের কারণে তাহার সহিত কোন প্রকার লেনদেন বা চুক্তি সম্পাদনের প্রয়োজন হইলে সেই সকল শর্তের বিবরণ;

(ঘ) নাগরিকদের তথ্য অধিকার নিশ্চিত করিবার জন্য প্রদত্ত সুবিধাদির বিবরণ এবং দায়িত্বপ্রাপ্ত কর্মকর্তার নাম, পদবী, ঠিকানা এবং, প্রয়োজ্য ক্ষেত্রে, ফ্যাক্স নম্বর, ই-মেইল ঠিকানা এবং দাপ্তরিক ও মুঠোফোন নম্বর।

(৪) কর্তৃপক্ষ গুরুত্বপূর্ণ কোন নীতি প্রণয়ন বা সিদ্ধান্ত গ্রহণ করিলে ঐ সকল নীতি ও সিদ্ধান্ত প্রকাশ করিবে এবং, প্রয়োজনে, ঐ সকল নীতি ও সিদ্ধান্ত গ্রহণের সমর্থনে যুক্তি ও কারণ ব্যাখ্যা করিবে।

(৫) এই ধারার অধীন কর্তৃপক্ষ কর্তৃক প্রণীত প্রতিবেদন বিনামূল্যে সর্বসাধারণের পরিদর্শনের জন্য সহজলভ্য করিতে হইবে এবং উহার কপি এতদসংক্রান্তে প্রবিধানমালা দ্বারা নির্ধারিত মূল্যে বিক্রয়ের জন্য মজুদ রাখিতে হইবে।

(৬) কর্তৃপক্ষ কর্তৃক প্রকাশিত সকল প্রকাশনা জনগণের নিকট উপযুক্ত মূল্যে সহজলভ্য করিতে হইবে।

(৭) কর্তৃপক্ষ জনগুরুত্বপূর্ণ বিষয়াদি প্রেস বিজ্ঞপ্তি, ইলেক্ট্রনিক মাধ্যমে অথবা অন্য কোন পন্থায় প্রচার বা প্রকাশ করিবে।

(৮) তথ্য কমিশন, প্রবিধান দ্বারা, কর্তৃপক্ষ কর্তৃক তথ্য প্রকাশ, প্রচার ও প্রাপ্তির জন্য অনুসরণীয় নির্দেশনা প্রদান করিবে এবং সকল কর্তৃপক্ষ উহা অনুসরণ করিবে।

৭। কতিপয় তথ্য প্রকাশ বা প্রদান বাধ্যতামূলক নয়।—এই আইনের অন্যান্য বিধানাবলীতে যাহা কিছুই থাকুক না কেন, কোন কর্তৃপক্ষ কোন নাগরিককে নিম্নলিখিত তথ্যসমূহ প্রদান করিতে বাধ্য থাকিবে না, যথাঃ—

(ক) কোন তথ্য প্রকাশের ফলে বাংলাদেশের নিরাপত্তা, অখন্ডতা ও সার্বভৌমত্বের প্রতি হুমকি হইতে পারে এইরূপ তথ্য;

(খ) পররাষ্ট্রনীতির কোন বিষয় যাহার দ্বারা বিদেশী রাষ্ট্রের অথবা আন্তর্জাতিক কোন সংস্থা বা আঞ্চলিক কোন জোট বা সংগঠনের সহিত বিদ্যমান সম্পর্ক ক্ষুণ্ণ হইতে পারে এইরূপ তথ্য;

(গ) কোন বিদেশী সরকারের নিকট হইতে প্রাপ্ত কোন গোপনীয় তথ্য;

(ঘ) কোন তথ্য প্রকাশের ফলে কোন তৃতীয় পক্ষের বুদ্ধিবৃত্তিক সম্পদের অধিকার ক্ষতিগ্রস্ত হইতে পারে এইরূপ বাণিজ্যিক বা ব্যবসায়িক অন্তর্নিহিত গোপনীয়তা বিষয়ক, কপিরাইট বা বুদ্ধিবৃত্তিক সম্পদ (Intellectual Property Right) সম্পর্কিত তথ্য;

(ঙ) কোন তথ্য প্রকাশের ফলে কোন বিশেষ ব্যক্তি বা সংস্থাকে লাভবান বা ক্ষতিগ্রস্ত করিতে পারে এইরূপ নিম্নোক্ত তথ্য, যথাঃ—

(অ) আয়কর, শুল্ক, ভ্যাট ও আবগারী আইন, বাজেট বা করহার পরিবর্তন সংক্রান্ত কোন আগাম তথ্য;

(আ) মুদ্রার বিনিময় ও সুদের হার পরিবর্তনজনিত কোন আগাম তথ্য;

(ই) ব্যাংকসহ আর্থিক প্রতিষ্ঠানসমূহের পরিচালনা ও তদারকি সংক্রান্ত কোন আগাম তথ্য;

(চ) কোন তথ্য প্রকাশের ফলে প্রচলিত আইনের প্রয়োগ বাধাগ্রস্ত হইতে পারে বা অপরাধ বৃদ্ধি পাইতে পারে এইরূপ তথ্য;

(ছ) কোন তথ্য প্রকাশের ফলে জনগণের নিরাপত্তা বিঘ্নিত হইতে পারে বা বিচারাধীন মামলার সুষ্ঠু বিচার কার্য ব্যাহত হইতে পারে এইরূপ তথ্য;

(জ) রাষ্ট্র বা সংস্থা বা প্রতিষ্ঠান এর স্বার্থ সংরক্ষিত নহে এইরূপ কোন তথ্য যাহা প্রকাশের ফলে কোন ব্যক্তির একান্ত ব্যক্তিগত জীবনের গোপনীয়তা ক্ষুণ্ণ হইতে পারে এইরূপ তথ্য;

(ঝ) কোন তথ্য প্রকাশের ফলে কোন ব্যক্তির জীবন বা শারীরিক নিরাপত্তা বিপদাপন্ন হইতে পারে এইরূপ তথ্য;

(ঞ) আইন প্রয়োগকারী সংস্থার সহায়তার জন্য কোন ব্যক্তি কর্তৃক গোপনে প্রদত্ত কোন তথ্য; (ট) আদালতে বিচারাধীন কোন বিষয় এবং যাহা প্রকাশে আদালত বা ট্রাইব্যুনালের নিষেধাজ্ঞা রহিয়াছে অথবা যাহার প্রকাশ আদালত অবমাননার শামিল এইরূপ তথ্য;

(ঠ) তদন্তাধীন কোন বিষয় যাহার প্রকাশ তদন্ত কাজে বিঘ্ন ঘটাইতে পারে এইরূপ তথ্য;

(ড) কোন অপরাধের তদন্ত প্রক্রিয়া এবং অপরাধীর গ্রেফতার ও শাস্তিকে প্রভাবিত করিতে পারে এইরূপ তথ্য;

(ঢ) আইন অনুসারে কেবল একটি নির্দিষ্ট সময়ের জন্য প্রকাশের বাধ্যবাধকতা রহিয়াছে এইরূপ তথ্য;

(ণ) কৌশলগত ও বাণিজ্যিক কারণে গোপন রাখা বাঞ্ছনীয় এইরূপ কারিগরী বা বৈজ্ঞানিক গবেষণালব্ধ কোন তথ্য;

(ত) কোন ক্রয় কার্যক্রম সম্পূর্ণ হইবার পূর্বে বা উক্ত বিষয়ে সিদ্ধান্ত গ্রহণের পূর্বে সংশ্লিষ্ট ক্রয় বা উহার কার্যক্রম সংক্রান্ত কোন তথ্য;

(খ) জাতীয় সংসদের বিশেষ অধিকার হানির কারণ হইতে পারে এইরূপ তথ্য; এইক্ষেত্রে, কোন অধিকার বিশেষ অধিকার হিসেবে আখ্যায়িত হইবে সেই বিষয়ে জাতীয় সংসদের সিদ্ধান্তই চূড়ান্ত বলিয়া বিবেচিত হইবে;

(দ) কোন ব্যক্তির আইন দ্বারা সংরক্ষিত গোপনীয় তথ্য;

(ধ) পরীক্ষার প্রশ্নপত্র বা পরীক্ষায় প্রদত্ত নম্বর সম্পর্কিত আগাম তথ্য;

(ন) কোন রোগীর রোগ বা চিকিৎসা সংক্রান্ত কোন তথ্য; তবে আদালতের আদেশ বা ক্ষেত্রমতে তাহার স্বামী বা স্ত্রী বা পুত্র/কন্যা বা পিতা-মাতা বা তাহাদের অনুপস্থিতিতে ভ্রাতা/ভগ্নির অনুমতি সাপেক্ষে উক্ত তথ্য প্রকাশ করা যাইবে।

(প) মন্ত্রিপরিষদ এর বৈঠকে উপস্থাপনীয় সার-সংক্ষেপসহ আনুষঙ্গিক দলিলাদি এবং উক্তরূপ বৈঠকের আলোচনা ও সিদ্ধান্ত সংক্রান্ত কোন তথ্য;

তবে শর্ত থাকে যে, মন্ত্রিপরিষদ কর্তৃক কোন সিদ্ধান্ত গৃহীত হইবার পর অনুরূপ সিদ্ধান্তের কারণ এবং যেসকল বিষয়ের উপর ভিত্তি করিয়া সিদ্ধান্তটি গৃহীত হইয়াছে উহা প্রকাশ করা যাইবে;

আরো শর্ত থাকে যে, এই ধারার অধীন তথ্য প্রদান স্থগিত রাখিবার ক্ষেত্রে সংশ্লিষ্ট কর্তৃপক্ষকে তথ্য কমিশনের পূর্বানুমোদন লিখিতভাবে গ্রহণ করিতে হইবে।

তৃতীয় অধ্যায়

দায়িত্বপ্রাপ্ত কর্মকর্তা, তথ্য প্রাপ্তির অনুরোধ ও তথ্য প্রদান পদ্ধতি

৮। দায়িত্বপ্রাপ্ত কর্মকর্তা।—(১) এই আইন কার্যকর হইবার অব্যবহিত পূর্বে বিদ্যমান প্রত্যেক কর্তৃপক্ষ, এই আইন জারীর ৬০ (ষাট) কার্যদিবসের মধ্যে, এই আইনের বিধান অনুযায়ী তথ্য সরবরাহের নিমিত্ত উক্ত কর্তৃপক্ষের প্রত্যেক তথ্য প্রদান ইউনিটের জন্য একজন করিয়া দায়িত্বপ্রাপ্ত কর্মকর্তা নিয়োগ করিবে;

তবে প্রয়োজনীয় সংখ্যক কর্মকর্তার অভাবে সংশ্লিষ্ট তথ্য প্রদান ইউনিটে কর্মরত কোন কর্মকর্তাকে অতিরিক্ত দায়িত্ব হিসেবে অত্র ধারার অধীনে তথ্য সরবরাহ করিবার নিমিত্ত দায়িত্বপ্রাপ্ত কর্মকর্তা নিয়োগ করিবে।

(২) এই আইন কার্যকর হইবার পর প্রতিষ্ঠিত কোন কর্তৃপক্ষ, উক্তরূপ কর্তৃপক্ষ প্রতিষ্ঠিত হইবার ৬০ (ষাট) কার্যদিবসের মধ্যে, এই আইনের বিধান অনুযায়ী তথ্য সরবরাহের নিমিত্ত উক্ত কর্তৃপক্ষের প্রত্যেক তথ্য প্রদান ইউনিটের জন্য একজন করিয়া দায়িত্বপ্রাপ্ত কর্মকর্তা নিয়োগ করিবে।

(৩) এই আইন কার্যকর হইবার পর কোন কর্তৃপক্ষ উহার কোন কার্যালয় সৃষ্টি করিলে, উক্তরূপ কার্যালয় সৃষ্টির তারিখ হইতে ৬০ (ষাট) কার্যদিবসের মধ্যে, এই আইনের বিধান অনুযায়ী তথ্য সরবরাহের নিমিত্ত উক্ত কার্যালয় তথা নবসৃষ্ট তথ্য প্রদান ইউনিটের জন্য একজন দায়িত্বপ্রাপ্ত কর্মকর্তা নিয়োগ করিবে।

(৪) প্রত্যেক কর্তৃপক্ষ উপ-ধারা (১), (২) ও (৩) এর অধীন নিয়োগকৃত প্রত্যেক দায়িত্বপ্রাপ্ত কর্মকর্তার নাম, পদবী, ঠিকানা এবং, প্রয়োজ্য ক্ষেত্রে, ফ্যাক্স নম্বর, দাপ্তরিক ও মুঠোফোন নম্বর এবং ই-মেইল ঠিকানা উক্তরূপ নিয়োগ প্রদানের ১৫ (পনের) কার্যদিবসের মধ্যে তথ্য কমিশনকে লিখিতভাবে অবহিত করিবে।

(৫) এই আইনের অধীন দায়িত্ব পালনের প্রয়োজনে কোন দায়িত্বপ্রাপ্ত কর্মকর্তা অন্য যে কোন কর্মকর্তার সহায়তা চাহিতে পারিবেন এবং কোন কর্মকর্তার নিকট হইতে এইরূপ সহায়তা চাওয়া হইলে তিনি উক্ত দায়িত্বপ্রাপ্ত কর্মকর্তাকে প্রয়োজনীয় সহায়তা প্রদান করিতে বাধ্য থাকিবেন।

(৬) কোন দায়িত্বপ্রাপ্ত কর্মকর্তা কর্তৃক উপ-ধারা (৫) এর অধীন অন্য কোন কর্মকর্তার সহায়তা চাওয়া হইলে এবং এইরূপ সহায়তা প্রদানে ব্যর্থতার জন্য আইনের কোন বিধান লঙ্ঘিত হইলে সেইক্ষেত্রে এই আইনের অধীন দায়-দায়িত্ব নির্ধারণের ক্ষেত্রে উক্ত অন্য কর্মকর্তাও দায়িত্বপ্রাপ্ত কর্মকর্তা বলিয়া গণ্য হইবেন।

৯। তথ্য প্রাপ্তির অনুরোধ।—(১) কোন ব্যক্তি এই আইনের অধীন তথ্য প্রাপ্তির জন্য সংশ্লিষ্ট কর্তৃপক্ষের নিকট তথ্য চাহিয়া লিখিতভাবে বা ইলেক্ট্রনিক মাধ্যম বা ই-মেইলে অনুরোধ করিতে পারিবেন। সংশ্লিষ্ট তথ্য প্রদান ইউনিটের প্রশাসনিক প্রধান উক্তরূপ অনুরোধ প্রাপ্তির ২৪ (চব্বিশ) ঘণ্টা বা ১(এক) কার্য দিবসের মধ্যে উক্ত ইউনিটের জন্য নির্ধারিত দায়িত্বপ্রাপ্ত কর্মকর্তার নিকট উহা প্রেরণ করিবেন।

(২) উপ-ধারা (১) এ উল্লিখিত অনুরোধে নিম্নলিখিতবিষয়সমূহের উল্লেখ থাকিতে হইবে, যথাঃ—

(অ) অনুরোধকারীর নাম, ঠিকানা, প্রয়োজ্য ক্ষেত্রে, ফ্যাক্স নম্বর, দাপ্তরিক ও মুঠোফোন নম্বর এবং ই-মেইল ঠিকানা;

(আ) যে তথ্যের জন্য অনুরোধ করা হইয়াছে উহার নির্ভুল এবং স্পষ্ট বর্ণনা;

(ই) অনুরোধকৃত তথ্যের অবস্থান নির্ণয়ের সুবিধার্থে অন্যান্য প্রয়োজনীয় প্রাসঙ্গিক তথ্যাবলী; এবং

(ঈ) কোন পদ্ধতিতে তথ্য পাইতে আগ্রহী উহার বর্ণনা অর্থাৎ পরিদর্শন করা, অনুলিপি নেওয়া, নোট নেওয়া বা অন্য কোন অনুমোদিত পদ্ধতি।

(৩) এই ধারার অধীন তথ্য প্রাপ্তির অনুরোধ কর্তৃপক্ষ কর্তৃক মুদ্রিত ফরমে বা, ক্ষেত্রমত, নির্ধারিত ফরমেটে হইতে হইবেঃ

তবে শর্ত থাকে যে, ফরম মুদ্রিত বা সহজলভ্য না হইলে কিংবা ফরমেট নির্ধারিত না হইলে, উপ-ধারা

(২) এ উল্লিখিত তথ্যাবলী সন্নিবেশ করিয়া সাদা কাগজে বা, ক্ষেত্রমত, ইলেক্ট্রনিক মিডিয়া বা ই-মেইলেও তথ্য প্রাপ্তির জন্য অনুরোধ করা যাইবে।

(৪) উপ-ধারা (১) এর অধীন তথ্য প্রাপ্তির ক্ষেত্রে অনুরোধকারীকে সংশ্লিষ্ট দায়িত্বপ্রাপ্ত কর্মকর্তা কর্তৃক উক্ত তথ্যের জন্য নির্ধারিত যুক্তিসংগত মূল্য পরিশোধ করিতে হইবে।

(৫) সরকার, তথ্য কমিশনের সহিত পরামর্শক্রমে এবং সরকারী গেজেটে প্রজ্ঞাপন দ্বারা, তথ্য প্রাপ্তির অনুরোধ ফিস এবং, প্রয়োজনে, তথ্যের মূল্য নির্ধারণ করিয়া দিতে পারিবে এবং, ক্ষেত্রমত, কোন ব্যক্তি বা ব্যক্তি-শ্রেণীকে কিংবা যে কোন শ্রেণীর তথ্যকে উক্ত মূল্য প্রদান হইতে অব্যাহতি প্রদান করিতে পারিবে।

(৬) প্রত্যেক কর্তৃপক্ষ, তথ্য কমিশনের নির্দেশনা অনুসরণে, বিনামূল্যে যে সকল তথ্য সরবরাহ করা হইবে উহার একটি তালিকা প্রস্তুত করিয়া প্রকাশ ও প্রচার করিবে।

১০। তথ্য প্রদান পদ্ধতি।—(১) দায়িত্বপ্রাপ্ত কর্মকর্তা ধারা ৮ এর উপ-ধারা (১) এর অধীন অনুরোধ প্রাপ্তির তারিখ হইতে অনধিক ২০ (বিশ) কার্য দিবসের মধ্যে অনুরোধকৃত তথ্য সরবরাহ করিবেন।

(২) উপ-ধারা (১) এ যাহা কিছুই থাকুক না কেন, অনুরোধকৃত তথ্যের সহিত একাধিক তথ্য প্রদান ইউনিট বা কর্তৃপক্ষের সংশ্লিষ্টতা থাকিলে অনধিক ৩০ (ত্রিশ) কার্য দিবসের মধ্যে উক্ত অনুরোধকৃত তথ্য সরবরাহ করিতে হইবে।

(৩) উপ-ধারা (১) ও (২) এ যাহা কিছুই থাকুক না কেন, দায়িত্বপ্রাপ্ত কর্মকর্তা কোন কারণে তথ্য প্রদানে অপারগ হইলে অপারগতার কারণ উল্লেখ করিয়া আবেদন প্রাপ্তির ১০ (দশ) কার্য দিবসের মধ্যে তিনি উহা অনুরোধকারীকে অবহিত করিবেন।

(৪) উপ-ধারা (১) এবং (২) এ যাহা কিছুই থাকুক না কেন, ধারা ৮ এর উপ-ধারা (১) এর অধীন অনুরোধকৃত তথ্য কোন ব্যক্তির জীবন-মৃত্যু, গ্রেফতার এবং কারাগার হইতে মুক্তি সম্পর্কিত হইলে দায়িত্বপ্রাপ্ত কর্মকর্তা অনুরোধ প্রাপ্তির অনধিক ২৪ (চব্বিশ) ঘণ্টার মধ্যে উক্ত বিষয়ে প্রাথমিক তথ্য সরবরাহ করিবেন।

(৫) উপ-ধারা (১), (২) বা (৪) এ উল্লিখিত সময়সীমার মধ্যে তথ্য সরবরাহ করিতে কোন দায়িত্বপ্রাপ্ত কর্মকর্তা ব্যর্থ হইলে সংশ্লিষ্ট তথ্য প্রাপ্তির অনুরোধ প্রত্যাখ্যান করা হইয়াছে বলিয়া গণ্য হইবে।

(৬) কোন অনুরোধকৃত তথ্য দায়িত্বপ্রাপ্ত কর্মকর্তার নিকট সরবরাহের জন্য মজুদ থাকিলে তিনি উক্ত তথ্যের যুক্তিসংগত মূল্য নির্ধারণ করিবেন এবং উক্ত মূল্য অনধিক ৫ (পাঁচ) কার্য দিবসের মধ্যে পরিশোধ করিবার জন্য অনুরোধকারীকে অবহিত করিবেন।

(৭) উপ-ধারা (৬) এর অধীন মূল্য নির্ধারণের ক্ষেত্রে তথ্য প্রদানের প্রকৃত ব্যয় যেমন—তথ্যের মুদ্রিত মূল্য ইলেক্ট্রনিক ফরমেট এর মূল্য কিংবা ফটোকপি বা প্রিন্ট আউট সংক্রান্ত যে ব্যয় হইবে উহা হইতে অধিক মূল্য নির্ধারণ করা যাইবে না।

(৮) ধারা ৮ এর উপ-ধারা (১) এর অধীন অনুরোধকৃত তথ্য প্রদান করা দায়িত্বপ্রাপ্ত কর্মকর্তার নিকট যথাযথ বিবেচিত হইলে এবং যেক্ষেত্রে উক্ত তথ্য তৃতীয় পক্ষ কর্তৃক সরবরাহ করা হইয়াছে কিংবা উক্ত তথ্যে তৃতীয় পক্ষের স্বার্থ জড়িত রহিয়াছে এবং তৃতীয় পক্ষ উহা গোপনীয় তথ্য হিসাবে গণ্য করিয়াছে সেইক্ষেত্রে দায়িত্বপ্রাপ্ত কর্মকর্তা উক্তরূপ অনুরোধ প্রাপ্তির ৫ (পাঁচ) কার্য দিবসের মধ্যে তৃতীয় পক্ষকে উহার লিখিত বা মৌখিক মতামত চাহিয়া নোটিশ প্রদান করিবেন এবং তৃতীয় পক্ষ এইরূপ নোটিশের প্রেক্ষিতে কোন মতামত প্রদান করিলে উহা বিবেচনায় লইয়া দায়িত্বপ্রাপ্ত কর্মকর্তা অনুরোধকারীকে তথ্য প্রদানের বিষয়ে সিদ্ধান্ত গ্রহণ করিবেন।

(৯) ধারা ৭ এ যাহা কিছুই থাকুক না কেন, তথ্য প্রকাশের জন্য বাধ্যতামূলক নয়, এইরূপ তথ্যের সহিত সম্পর্কযুক্ত হইবার কারণে কোন অনুরোধ সম্পূর্ণ প্রত্যাখ্যান করা যাইবে না এবং অনুরোধের যতটুকু অংশ প্রকাশের জন্য বাধ্যতামূলক নয় এবং যতটুকু অংশ যৌক্তিকভাবে পৃথক করা সম্ভব, ততটুকু অংশ অনুরোধকারীকে সরবরাহ করিতে হইবে।

(১০) কোন ইন্দ্রীয় প্রতিবন্ধী ব্যক্তিকে কোন রেকর্ড বা উহার অংশবিশেষ জানাইবার প্রয়োজন হইলে সংশ্লিষ্ট দায়িত্বপ্রাপ্ত কর্মকর্তা উক্ত প্রতিবন্ধী ব্যক্তিকে তথ্য লাভে সহায়তা প্রদান করিবেন এবং পরিদর্শনের জন্য যে ধরণের সহযোগিতা প্রয়োজন তাহা প্রদান করাও এই সহায়তার অন্তর্ভুক্ত বলিয়া গণ্য হইবে।

তবে শর্ত থাকে যে, অত্র ধারার অধীনে তথ্য সরবরাহ করিবার পূর্বে দায়িত্বপ্রাপ্ত কর্মকর্তা সংশ্লিষ্ট ইউনিটের প্রশাসনিক প্রধানকে অবহিত করিবেন।

চতুর্থ অধ্যায়

তথ্য কমিশন প্রতিষ্ঠা, ইত্যাদি

১১। তথ্য কমিশন প্রতিষ্ঠা।—(১) এই আইন কার্যকর হইবার পর, অনধিক ৯০ (নব্বই) কার্যদিবসের মধ্যে, এই আইনের উদ্দেশ্য পূরণকল্পে এবং উহার বিধান অনুসারে তথ্য কমিশন নামে একটি কমিশন প্রতিষ্ঠিত হইবে।

(২) তথ্য কমিশন একটি সংবিধিবদ্ধ স্বাধীন সংস্থা হইবে এবং ইহার স্থায়ী ধারাবাহিকতা ও একটি সাধারণ সীলমোহর থাকিবে এবং এই আইনের বিধানাবলী সাপেক্ষে, উহার স্থাবর ও অস্থাবর উভয় প্রকার সম্পত্তি অর্জন করিবার, অধিকারে রাখিবার এবং হস্তান্তর করিবার ক্ষমতা থাকিবে এবং ইহার নামে ইহা মামলা দায়ের করিতে পরিবে বা ইহার বিরুদ্ধেও মামলা দায়ের করা যাইবে।

(৩) তথ্য কমিশনের প্রধান কার্যালয় বাংলাদেশের রাজধানী ঢাকায় থাকিবে এবং কমিশন, প্রয়োজনে, বাংলাদেশের যে কোন স্থানে উহার শাখা কার্যালয় স্থাপন করিতে পারিবে।

১২। তথ্য কমিশনের গঠন।—(১) প্রধান তথ্য কমিশনার এবং অন্য ২ (দুই) জন তথ্য কমিশনার সমন্বয়ে তথ্য কমিশন গঠিত হইবে, যাহাদের মধ্যে অন্যান্য ১ (এক) জন মহিলা হইবেন।

(২) প্রধান তথ্য কমিশনার তথ্য কমিশনের প্রধান নির্বাহী হইবেন।

(৩) তথ্য কমিশনের কোন পদে শূন্যতা বা উহা গঠনে ত্রুটি থাকিবার কারণে তথ্য কমিশনের কোন কার্য বা কার্যধারা অবৈধ হইবে না বা তৎসম্পর্কে কোন প্রশংসিত উত্থাপন করা যাইবে না।

১৩। তথ্য কমিশনের ক্ষমতা ও কার্যাবলী।—(১) কোন ব্যক্তি নিম্নলিখিত কারণে কোন অভিযোগ দায়ের করিলে তথ্য কমিশন, এই আইনের বিধানাবলী সাপেক্ষে, উক্ত অভিযোগ গ্রহণ, উহার অনুসন্ধান এবং নিষ্পত্তি করিতে পারিবে, যথাঃ—

(ক) কোন কর্তৃপক্ষ কর্তৃক দায়িত্বপ্রাপ্ত কর্মকর্তা নিয়োগ না করা কিংবা তথ্যের জন্য অনুরোধপত্র গ্রহণ না করা;

(খ) কোন তথ্য চাহিদা প্রত্যাখ্যাত হইলে;

(গ) তথ্যের জন্য অনুরোধ করিয়া, এই আইনে উল্লিখিত নির্ধারিত সময়সীমার মধ্যে, কর্তৃপক্ষের নিকট হইতে কোন জবাব বা তথ্য প্রাপ্ত না হইলে;

(ঘ) কোন তথ্যের এমন অংকের মূল্য দাবী করা হইলে, বা প্রদানে বাধ্য করা হইলে, যাহা তাহার বিবেচনায় যৌক্তিক নয়;

(ঙ) অনুরোধের প্রেক্ষিতে অসম্পূর্ণ তথ্য প্রদান করা হইলে বা যে তথ্য প্রদান করা হইয়াছে উহা ভ্রান্ত ও বিভ্রান্তিকর বলিয়া মনে হইলে;

(চ) এই আইনের অধীন তথ্যের জন্য অনুরোধ জ্ঞাপন বা তথ্য প্রাপ্তি সম্পর্কিত অন্য যে কোন বিষয়।

(২) তথ্য কমিশন স্ব-প্রণোদিত হইয়া অথবা কোন অভিযোগের ভিত্তিতে এই আইনের অধীন উত্থাপিত অভিযোগ সম্পর্কে অনুসন্ধান করিতে পারিবে।

(৩) নিম্নলিখিত বিষয়ে Code of Civil Procedure, 1908 (Act V of 1908) এর অধীন একটি দেওয়ানী আদালত যে ক্ষমতা প্রয়োগ করিতে পারিবে তথ্য কমিশন বা, ক্ষেত্রমত, প্রধান তথ্য কমিশনার বা তথ্য কমিশনারও এই ধারার অধীন সেইরূপ ক্ষমতা প্রয়োগ করিতে পারিবেন, যথাঃ—

(ক) কোন ব্যক্তিকে তথ্য কমিশনে হাজির করিবার জন্য সমন জারী করা এবং শপথপূর্বক মৌখিক বা লিখিত প্রমাণ, দলিল বা অন্য কোন কিছু হাজির করিতে বাধ্য করা;

(খ) তথ্য যাচাই ও পরিদর্শন করা;

(গ) হলফনামাসহ প্রমাণ গ্রহণ করা;

(ঘ) কোন অফিসের কোন তথ্য আনয়ন করা;

(ঙ) কোন সাক্ষী বা দলিল তলব করিয়া সমন জারী করা; এবং

(চ) এই আইনের উদ্দেশ্য পূরণকল্পে, বিধি দ্বারা নির্ধারিত অন্য যে কোন বিষয়।

(৪) অন্য কোন আইনে ভিন্নরূপ যাহা কিছুই থাকুক না কেন, এই আইনের অধীন কোন অভিযোগ অনুসন্ধানকালে তথ্য কমিশন বা, ক্ষেত্রমত, প্রধান তথ্য কমিশনার বা তথ্য কমিশনার কোন কর্তৃপক্ষের নিকট রক্ষিত অভিযোগ সংশ্লিষ্ট যে কোন তথ্য সরেজমিনে পরীক্ষা করিতে পারিবেন।

(৫) তথ্য কমিশনের কার্যাবলী হইবে নিম্নরূপ, যথাঃ—

(ক) কর্তৃপক্ষ কর্তৃক তথ্য সংরক্ষণ, ব্যবস্থাপনা, প্রকাশ, প্রচার ও প্রাপ্তির বিষয়ে নির্দেশনা প্রদান;

(খ) কর্তৃপক্ষের নিকট হইতে তথ্য প্রাপ্তির লক্ষ্যে অনুরোধের পদ্ধতি নির্ধারণ ও, ক্ষেত্রমত, তথ্যের উপযুক্ত মূল্য নির্ধারণ;

- (গ) নাগরিকদের তথ্য অধিকার সংরক্ষণ ও বাস্তবায়নের বিষয়ে নীতিমালা এবং নির্দেশনা প্রণয়ন ও প্রকাশ;
- (ঘ) তথ্য অধিকার সংরক্ষণের জন্য গণপ্রজাতন্ত্রী বাংলাদেশের সংবিধান বা আপাততঃ বলবৎ অন্য কোন আইনের অধীন স্বীকৃত ব্যবস্থাাদি পর্যালোচনা করা এবং উহার কার্যকর বাস্তবায়নের জন্য অসুবিধাসমূহ চিহ্নিত করিয়া উহা দূরীকরণার্থে সরকারের নিকট সুপারিশ প্রদান;
- (ঙ) নাগরিকদের তথ্য অধিকার সংরক্ষণ ও বাস্তবায়নের বিষয়ে বাধাসমূহ চিহ্নিত করা এবং যথাযথ প্রতিকারের জন্য সরকারের নিকট সুপারিশ প্রদান;
- (চ) তথ্য অধিকার বিষয়ক চুক্তিসহ অন্যান্য আন্তর্জাতিক দলিলাদির উপর গবেষণা করা এবং উহা বাস্তবায়নের জন্য সরকারের নিকট সুপারিশ প্রদান;
- (ছ) নাগরিকদের তথ্য অধিকার সংরক্ষণ ও বাস্তবায়নের বিষয়ে তথ্য অধিকার সম্পর্কিত বিভিন্ন আন্তর্জাতিক দলিলের সহিত বিদ্যমান আইনের সাদৃশ্যতা পরীক্ষা করা এবং বৈসাদৃশ্য পরিলক্ষিত হওয়ার ক্ষেত্রে উহা দূরীকরণার্থে সরকার বা, ক্ষেত্রমত, সংশ্লিষ্ট কর্তৃপক্ষের নিকট প্রয়োজনীয় সুপারিশ প্রদান;
- (জ) তথ্য অধিকার বিষয়ে আন্তর্জাতিক দলিল অনুসমর্থন বা উহাতে স্বাক্ষর প্রদানে সরকারকে পরামর্শ প্রদান;
- (ঝ) তথ্য অধিকার সংরক্ষণ ও বাস্তবায়নের বিষয়ে গবেষণা করা এবং শিক্ষা ও পেশাগত প্রতিষ্ঠানকে উক্তরূপ গবেষণা পরিচালনায় সহায়তা প্রদান;
- (ঞ) সমাজের বিভিন্ন শ্রেণীর নাগরিকদের মধ্যে তথ্য অধিকার সংরক্ষণ ও বাস্তবায়নের বিষয়ে প্রচার এবং প্রকাশনা ও অন্যান্য উপায়ে তথ্য অধিকার বিষয়ে সচেতনতা বৃদ্ধিকরণ;
- (ট) তথ্য অধিকার সংরক্ষণ ও বাস্তবায়নের লক্ষ্যে প্রয়োজনীয় আইন ও প্রশাসনিক নির্দেশনা প্রণয়নের ব্যাপারে সরকারকে পরামর্শ ও সহযোগিতা প্রদান;
- (ঠ) তথ্য অধিকার সংরক্ষণ ও বাস্তবায়নের লক্ষ্যে কর্মরত সংগঠন বা প্রতিষ্ঠান এবং নাগরিক সমাজকে প্রয়োজনীয় পরামর্শ ও সহায়তা প্রদান;
- (ড) তথ্য অধিকার বিষয়ে গবেষণা, সেমিনার, সিম্পোজিয়াম বা ওয়ার্কশপের আয়োজন এবং অনুরূপ অন্যবিধ ব্যবস্থার মাধ্যমে গণসচেতনতা বৃদ্ধি করা এবং গবেষণালব্ধ ফলাফল প্রচার;
- (ঢ) তথ্য অধিকার নিশ্চিতকরণের লক্ষ্যে কর্তৃপক্ষকে কারিগরী ও অন্যান্য সহায়তা প্রদান;
- (ণ) তথ্য অধিকার নিশ্চিতকরণের লক্ষ্যে বাংলাদেশের জন্য একটি ওয়েব পোর্টাল স্থাপন;
- (ত) তথ্য অধিকার সংরক্ষণ ও বাস্তবায়নের বিষয়ে অন্য কোন আইনে গৃহীত ব্যবস্থাাদি পর্যালোচনা করা; এবং
- (থ) সরবরাহকৃত তথ্য হইতে কোন ফৌজদারি অপরাধ প্রকাশ পাইলে তথ্য কমিশন বিষয়টি সংশ্লিষ্ট মন্ত্রণালয়, তথ্য মন্ত্রণালয় ও আইন প্রয়োগকারী সংস্থাকে অবহিত করিবেন।**

১৪। বাছাই কমিটি।—(১) প্রধান তথ্য কমিশনার ও তথ্য কমিশনার নিয়োগের জন্য সুপারিশ প্রদানের উদ্দেশ্যে নিম্নবর্ণিত ৭ (সাত) জন সদস্য সমন্বয়ে একটি বাছাই কমিটি গঠিত হইবে, যথাঃ—

- (ক) জাতীয় সংসদের স্পীকার, যিনি উহার সভাপতিও হইবেন;
- (খ) গণপ্রজাতন্ত্রী বাংলাদেশ সরকারের তথ্য মন্ত্রণালয়ের দায়িত্বপ্রাপ্ত মন্ত্রী;
- (গ) মন্ত্রিপরিষদ সচিব, গণপ্রজাতন্ত্রী বাংলাদেশ সরকার;
- (ঘ) তথ্য সচিব, গণপ্রজাতন্ত্রী বাংলাদেশ সরকার;

(ঙ) সংসদ কার্যকর থাকাকালীন অবস্থায় স্পিকার কর্তৃক মনোনীত সরকারি দলের একজন এবং বিরোধী দলের একজন সংসদ সদস্য;

(চ) সম্পাদকের যোগ্যতা সম্পন্ন সাংবাদিকতা পেশায় নিয়োজিত এমন অথবা গণমাধ্যমের সহিত সম্পর্কিত সমাজের বিশিষ্ট নাগরিকগণের মধ্য হইতে সরকার কর্তৃক মনোনীত একজন প্রতিনিধি;

(ছ) সরকার কর্তৃক মনোনীত সুশীল সমাজের একজন প্রতিনিধি।

(২) তথ্য মন্ত্রণালয় উপ-ধারা (১) এর অধীন বাছাই কমিটি গঠনে এবং উক্ত বাছাই কমিটির কার্য-সম্পাদনে প্রয়োজনীয় সাচিবিক সহায়তা প্রদান করিবে।

(৩) অনূন ৩ (তিন) জন সদস্যের উপস্থিতিতে বাছাই কমিটির কোরাম গঠিত হইবে।

(৪) বাছাই কমিটি, প্রধান তথ্য কমিশনার ও তথ্য কমিশনার নিয়োগের নিমিত্ত রাষ্ট্রপতির নিকট, সভায় উপস্থিত সদস্যগণের সংখ্যাগরিষ্ঠ সিদ্ধান্তের ভিত্তিতে, প্রতিটি শূন্য পদের বিপরীতে ২ (দুই) জন ব্যক্তির নাম সুপারিশ করিবে।

(৫) বাছাই কমিটিতে ভোটের সমতার ক্ষেত্রে সভাপতির দ্বিতীয় বা নির্ণায়ক ভোট প্রদানের অধিকার থাকিবে।

(৬) বাছাই কমিটি উহার সভার কার্যপদ্ধতি নির্ধারণ করিতে পারিবে।

(৭) শুধুমাত্র কোন সদস্যপদে শূন্যতা বা বাছাই কমিটি গঠনে ত্রুটি থাকিবার কারণে, উহার কোন কার্য বা কার্যধারা অবৈধ হইবে না বা তৎসম্পর্কে কোন প্রশংসিত উত্থাপন করা যাইবে না।

১৫। প্রধান তথ্য কমিশনার ও তথ্য কমিশনারগণের নিয়োগ, মেয়াদ, পদত্যাগ, ইত্যাদি।—(১) রাষ্ট্রপতি, বাছাই কমিটির সুপারিশক্রমে, প্রধান তথ্য কমিশনার এবং অন্যান্য তথ্য কমিশনারগণকে নিয়োগ করিবেন।

(২) [বিয়োজন করা হয়েছে]।

(৩) প্রধান তথ্য কমিশনার ও তথ্য কমিশনারগণ নিয়োগ লাভের তারিখ হইতে ৩ (তিন) বৎসর পূরণ হওয়া পর্যন্ত স্থায়ী পদে বহাল থাকিবেন।

(৪) প্রধান তথ্য কমিশনার এবং তথ্য কমিশনারগণ একই পদে পুনরায় নিয়োগ লাভের অযোগ্য হইবেন না এবং কোন তথ্য কমিশনার প্রধান তথ্য কমিশনার পদে নিয়োগ লাভের অযোগ্য হইবেন না।

(৫) আইন, বিচার, সাংবাদিকতা, শিক্ষা, বিজ্ঞান, প্রযুক্তি, তথ্য, সমাজকর্ম, ব্যবস্থাপনা বা জনপ্রশাসনে ব্যাপক জ্ঞান ও অভিজ্ঞতার অধিকারী ব্যক্তিগণের মধ্য হইতে প্রধান তথ্য কমিশনার এবং তথ্য কমিশনারগণ, এই ধারার বিধানাবলী সাপেক্ষে, নিযুক্ত হইবেন।

(৬) প্রধান তথ্য কমিশনার বা তথ্য কমিশনারগণ রাষ্ট্রপতির উদ্দেশ্যে স্বাক্ষরযুক্ত পত্রযোগে যে কোনো সময় স্থায়ী পদ ত্যাগ করিতে পারিবেন।

(৭) প্রধান তথ্য কমিশনারের পদ শূন্য হইলে কিংবা অনুপস্থিতি, অসুস্থতা বা অন্য কোনো কারণে প্রধান তথ্য কমিশনার তাঁহার দায়িত্ব পালনে অসমর্থ হইলে, নবনিযুক্ত প্রধান তথ্য কমিশনার তাঁহার পদে যোগদান না করা পর্যন্ত কিংবা প্রধান তথ্য কমিশনার পুনরায় স্থায়ী দায়িত্ব পালনে সমর্থ না হওয়া পর্যন্ত জ্যেষ্ঠতম তথ্য কমিশনার প্রধান তথ্য কমিশনার পদের দায়িত্ব পালন করিবেন।

১৬। প্রধান তথ্য কমিশনার ও তথ্য কমিশনারগণের অপসারণ।—(১) সুপ্রীম কোর্টের একজন বিচারক যেরূপ কারণ ও পদ্ধতিতে অপসারিত হইতে পারেন, সেইরূপ কারণ ও পদ্ধতি ব্যতীত প্রধান তথ্য কমিশনার বা কোন তথ্য কমিশনারকে অপসারণ করা যাইবে না।

(২) উপ-ধারা (১) এ যাহা কিছুই থাকুক না কেন, রাষ্ট্রপতি প্রধান তথ্য কমিশনার বা অন্য কোন তথ্য কমিশনারকে তাহার পদ হইতে অপসারণ করিতে পারিবেন, যদি তিনি—

- (ক) কোন উপযুক্ত আদালত কর্তৃক দেউলিয়া ঘোষিত হন; বা
- (খ) পারিশ্রমিকের বিনিময়ে স্বীয় দায়িত্ব বহিষ্ঠত অন্য কোন পদে নিয়োজিত হন; বা
- (গ) কোন উপযুক্ত আদালত কর্তৃক অপকৃতস্থ ঘোষিত হন; বা
- (ঘ) নৈতিক স্বলনজনিত কোন অপরাধে দোষী সাব্যস্ত হন।

১৭। তথ্য কমিশনারগণের পদমর্যাদা, পারিশ্রমিক ও সুবিধাদি।—প্রধান তথ্য কমিশনার ও তথ্য কমিশনারগণের পদমর্যাদা, পারিশ্রমিক, ভাতা, ও অন্যান্য আনুষঙ্গিক সুবিধাদি সরকার কর্তৃক নির্ধারিত হইবে।

১৮। তথ্য কমিশনের সভা।—(১) এই আইনের বিধানাবলী সাপেক্ষে, তথ্য কমিশন উহার সভার কার্যপদ্ধতি নির্ধারণ করিতে পারিবে।

(২) প্রধান তথ্য কমিশনার তথ্য কমিশনের সকল সভায় সভাপতিত্ব করিবেন এবং তাহার অনুপস্থিতিতে তথ্য কমিশনারগণের মধ্যে যিনি তথ্য কমিশনার হিসাবে জ্যেষ্ঠতম তিনি সভায় সভাপতিত্ব করিবেন।

(৩) প্রধান তথ্য কমিশনার এবং তথ্য কমিশনারগণের মধ্যে যে কোন ১ (এক) জনের উপস্থিতিতে তথ্য কমিশনের সভার কোরাম গঠিত হইবে।

(৪) তথ্য কমিশনের সভায় সিদ্ধান্ত গ্রহণে প্রধান তথ্য কমিশনার এবং অন্যান্য তথ্য কমিশনারগণের একটি করিয়া ভোট থাকিবে এবং ভোটের সমতার ক্ষেত্রে সভায় সভাপতিত্বকারী ব্যক্তির দ্বিতীয় বা নির্ণায়ক ভোট প্রদানের অধিকার থাকিবে।

পঞ্চম অধ্যায়

তথ্য কমিশনের আর্থিক বিষয়াদি

১৯। তথ্য কমিশন তহবিল।—(১) এই আইনের উদ্দেশ্য পূরণকল্পে তথ্য কমিশন তহবিল নামে একটি তহবিল গঠিত হইবে।

(২) তথ্য কমিশন তহবিল এর পরিচালনা ও প্রশাসন, এই ধারা এবং বিধির বিধান সাপেক্ষে, তথ্য কমিশনের উপর ন্যস্ত থাকিবে।

(৩) তথ্য কমিশন তহবিল হইতে প্রধান তথ্য কমিশনার ও তথ্য কমিশনারগণের এবং সচিব ও অন্যান্য কর্মকর্তা-কর্মচারীদের বেতন, ভাতা ও চাকুরীর শর্তাবলী অনুসারে প্রদেয় অর্থ প্রদান করা হইবে এবং তথ্য কমিশনের প্রয়োজনীয় অন্যান্য ব্যয় নির্বাহ করা হইবে।

(৪) তথ্য কমিশন তহবিলে নিম্নবর্ণিত অর্থ জমা হইবে, যথাঃ—

- (ক) সরকার কর্তৃক প্রদত্ত বাৎসরিক অনুদান;
- (খ) সরকারের সম্মতিক্রমে কোন প্রতিষ্ঠান কর্তৃক প্রদত্ত অনুদান।

২০। বাজেট।—তথ্য কমিশন প্রতি বৎসর সরকার কর্তৃক নির্দিষ্ট সময়ের মধ্যে পরবর্তী অর্থ-বৎসরের বার্ষিক বাজেট বিবরণী সরকার কর্তৃক এতদুদ্দেশ্যে নির্দিষ্ট ফরমে অনুমোদনের জন্য সরকারের নিকট পেশ করিবে এবং উহাতে উক্ত অর্থ-বৎসরে সরকারের নিকট হইতে তথ্য কমিশনের কি পরিমাণ অর্থের প্রয়োজন হইবে উহার উল্লেখ থাকিবে।

২১। তথ্য কমিশনের আর্থিক স্বাধীনতা।—(১) সরকার প্রতি অর্থ-বৎসরে তথ্য কমিশনের ব্যয়ের জন্য, উহার চাহিদা বিবেচনায়, উহার অনুকূলে নির্দিষ্টকৃত অর্থ বরাদ্দ করিবে এবং অনুমোদিত ও নির্ধারিত খাতে উক্ত বরাদ্দকৃত অর্থ হইতে ব্যয় করিবার ক্ষেত্রে সরকারের পূর্বানুমোদন গ্রহণ করা তথ্য কমিশনের জন্য আবশ্যিক হইবে না।

(২) এই ধারার বিধান দ্বারা গণপ্রজাতন্ত্রী বাংলাদেশের সংবিধানের ১২৮ অনুচ্ছেদে প্রদত্ত মহাহিসাব নিরীক্ষকের অধিকার ক্ষুণ্ণ করা হইয়াছে বলিয়া ব্যাখ্যা করা যাইবে না।

২২। হিসাব রক্ষণ ও নিরীক্ষা।—(১) তথ্য কমিশন যথাযথভাবে উহার হিসাব রক্ষণ করিবে এবং হিসাবের বার্ষিক বিবরণী প্রস্তুত করিবে।

(২) বাংলাদেশের মহাহিসাব নিরীক্ষক ও নিয়ন্ত্রক, অতঃপর মহাহিসাব নিরীক্ষক নামে অভিহিত, প্রতি বৎসর তথ্য কমিশনের হিসাব নিরীক্ষা করিবেন এবং নিরীক্ষা রিপোর্টের একটি করিয়া অনুলিপি সরকার ও তথ্য কমিশনের নিকট পেশ করিবেন।

(৩) উপ-ধারা (২) মোতাবেক হিসাব নিরীক্ষার উদ্দেশ্যে মহাহিসাব নিরীক্ষক কিংবা তাহার নিকট হইতে এতদুদ্দেশ্যে ক্ষমতাপ্রাপ্ত কোন ব্যক্তি তথ্য কমিশনের সকল রেকর্ড, দলিল দস্তাবেজ, নগদ বা ব্যাংকে গচ্ছিত অর্থ, জামানত, ভাণ্ডার এবং অন্যবিধ সম্পত্তি পরীক্ষা করিয়া দেখিতে পারিবেন এবং প্রধান তথ্য কমিশনার বা তথ্য কমিশনারগণ বা যে কোন কর্মকর্তা বা কর্মচারীকে জিজ্ঞাসাবাদ করিতে পারিবেন।

ষষ্ঠ অধ্যায়

তথ্য কমিশনের কর্মকর্তা ও কর্মচারী

২৩। তথ্য কমিশনের সচিব এবং অন্যান্য কর্মকর্তা ও কর্মচারী।—(১) তথ্য কমিশনের একজন সচিব থাকিবেন।

(২) এই আইনের অধীন তথ্য কমিশন উহার কার্যাবলী সুষ্ঠুভাবে সম্পাদনের লক্ষ্যে সরকারের পূর্বানুমোদনক্রমে সাংগঠনিক কাঠামো নির্ধারণপূর্বক প্রয়োজনীয় সংখ্যক অন্যান্য কর্মকর্তা ও কর্মচারী নিয়োগ করিতে পারিবে।

(৩) সচিব এবং অন্যান্য কর্মকর্তা ও কর্মচারীদের বেতন, ভাতা ও চাকুরীর শর্তাদি সরকার কর্তৃক নির্ধারিত হইবে।

(৪) সরকার, তথ্য কমিশনের অনুরোধক্রমে, প্রজাতন্ত্রের কর্মে নিযুক্ত কোনো কর্মকর্তা ও কর্মচারীকে কমিশনে প্রেরণে নিয়োগ করিতে পারিবে।

সপ্তম অধ্যায়

রিভিউ, অভিযোগ, ইত্যাদি

২৪। রিভিউ নিষ্পত্তি, ইত্যাদি।—(১) কোন ব্যক্তি ধারা ৯ এর উপ-ধারা (১), (২) বা (৪) এ নির্ধারিত সময়সীমার মধ্যে তথ্য লাভে ব্যর্থ হইলে কিংবা দায়িত্বপ্রাপ্ত কর্মকর্তার কোন সিদ্ধান্তে সংশ্লিষ্ট হইলে উক্ত সময়সীমা অতিক্রান্ত হইবার, বা ক্ষেত্রমত, সিদ্ধান্ত লাভ করিবার পরবর্তী ৩০ (ত্রিশ) কাযদিবসের মধ্যে রিভিউ কর্তৃপক্ষের নিকট রিভিউ করিতে পারিবেন।

(২) রিভিউ কর্তৃপক্ষ যদি এই মর্মে সন্তুষ্ট হন যে, রিভিউকারী যুক্তিসংগত কারণে উপ-ধারা (১) এ নির্দিষ্ট সময়সীমার মধ্যে রিভিউ দায়ের করিতে পারেন নাই, তাহা হইলে তিনি উক্ত সময়সীমা অতিবাহিত হওয়ার পরবর্তী ১৫ কাযদিবসের মধ্যে রিভিউ আবেদন গ্রহণ করিতে পারিবেন।

(৩) রিভিউ কর্তৃপক্ষ উপ-ধারা (১) বা (২) এর অধীন রিভিউ আবেদন প্রাপ্তির পরবর্তী ১৫ (পনের) কাযদিবসের মধ্যে—

(ক) রিভিউ আবেদনকারীকে অনুরোধকৃত তথ্য সরবরাহের জন্য সংশ্লিষ্ট দায়িত্বপ্রাপ্ত কর্মকর্তাকে নির্দেশ প্রদান করিবেন; অথবা

(খ) তদ্বিবেচনায় গ্রহণযোগ্য না হইলে রিভিউ আবেদনটি খারিজ করিয়া দিবেন।

(৪) উপ-ধারা (৩) এর অধীন তথ্য প্রদানের জন্য নিদেশিত হইলে, দায়িত্বপ্রাপ্ত কর্মকর্তা উক্তরূপ নির্দেশ প্রাপ্তির তারিখ হইতে ধারা ৯ এর, ক্ষেত্রমত, উপ-ধারা (১), (২) বা (৪) এ নির্ধারিত সময়সীমার মধ্যে **রিভিউ** আবেদনকারীকে অনুরোধকৃত তথ্য সরবরাহ করিবেন।

২৫। অভিযোগ দায়ের, নিষ্পত্তি, ইত্যাদি।—(১) কোন ব্যক্তি নিম্নলিখিত কারণে তথ্য কমিশনে অভিযোগ দায়ের করিতে পারিবে, যথা:—

(ক) ধারা ১৩ এর উপ-ধারা (১) এ উল্লিখিত কারণে তথ্য প্রাপ্ত না হইলে;

(খ) ধারা ২৪ এর অধীন প্রদত্ত **রিভিউ এর** সিদ্ধান্তে সংক্ষুব্ধ হইলে;

(গ) ধারা ২৪ এ উল্লিখিত সময়সীমার মধ্যে তথ্য প্রাপ্তি বা, ক্ষেত্রমত, তথ্য প্রদান সংক্রান্ত সিদ্ধান্ত প্রাপ্ত না হইলে।

(২) উপ-ধারা (১) এর দফা (ক) তে উল্লিখিত বিষয়ে যে কোন সময় এবং দফা (খ) ও (গ) তে উল্লিখিত বিষয়ে উক্তরূপ সিদ্ধান্ত প্রদানের তারিখ বা, ক্ষেত্রমত, সময়সীমা অতিক্রান্ত হইবার তারিখ হইতে পরবর্তী ৩০ (ত্রিশ) **কাযদিবসের** মধ্যে তথ্য কমিশনে অভিযোগ দায়ের করিতে পারিবেন।

(৩) তথ্য কমিশন যদি এই মর্মে সন্তুষ্ট হন যে, অভিযোগকারী যুক্তিসংগত কারণে উপ-ধারা (২) এ নির্দিষ্ট সময়সীমার মধ্যে অভিযোগ দায়ের করিতে পারেন নাই, তাহা হইলে তথ্য কমিশন উক্ত সময়সীমা অতিবাহিত হওয়ার **পরবর্তী ১৫ (পনের) কাযদিবসের মধ্যে** অভিযোগ গ্রহণ করিতে পারিবেন।

(৪) কোন অভিযোগের ভিত্তিতে কিংবা অন্য কোনভাবে তথ্য কমিশন যদি এই মর্মে সন্তুষ্ট হয় যে, কোন কর্তৃপক্ষ বা, ক্ষেত্রমত, কোন দায়িত্বপ্রাপ্ত কর্মকর্তা এই আইনের বিধানাবলী অনুসরণে করণীয় কোন কার্য করিতে ব্যর্থ হইয়াছেন বা করণীয় নয় এমন কার্য করিয়াছেন তাহা হইলে তথ্য কমিশন এই ধারার অধীন উক্ত কর্তৃপক্ষ বা, ক্ষেত্রমত, দায়িত্বপ্রাপ্ত কর্মকর্তার বিরুদ্ধে কার্যক্রম গ্রহণ করিতে পারিবে।

(৫) উপ-ধারা (১) এর অধীন অভিযোগ প্রাপ্তির পর কিংবা উপ-ধারা (৪) এর অধীন কোন কার্যক্রম গ্রহণের প্রয়োজন হইলে প্রধান তথ্য কমিশনার উক্ত অভিযোগটি স্বয়ং অনুসন্ধান করিবেন অথবা অনুসন্ধানের জন্য অন্য কোন তথ্য কমিশনারকে দায়িত্ব প্রদান করিবেন।

(৬) উপ-ধারা (৫) এ উল্লিখিত দায়িত্ব গ্রহণ বা প্রাপ্তির ৩০(ত্রিশ) **কাযদিবসের** মধ্যে সংশ্লিষ্ট অভিযোগের অনুসন্ধান সম্পন্ন করিয়া প্রধান তথ্য কমিশনার বা, ক্ষেত্রমত, তথ্য কমিশনার তথ্য কমিশনের জন্য একটি সিদ্ধান্ত কার্যপত্র প্রস্তুত করিবেন।

(৭) উপ-ধারা (৬) এ উল্লিখিত সিদ্ধান্ত কার্যপত্র তথ্য কমিশনের পরবর্তী সভায় উপস্থাপন করিতে হইবে এবং তথ্য কমিশন উহার সভায় আলোচনাক্রমে এই বিষয়ে সিদ্ধান্ত গ্রহণ করিবে।

(৮) এই ধারায় উল্লিখিত কোন অভিযোগের অনুসন্ধানকালে যে কর্তৃপক্ষ বা দায়িত্বপ্রাপ্ত কর্মকর্তার সিদ্ধান্তের বিরুদ্ধে অভিযোগ দায়ের করা হয় সেই কর্তৃপক্ষ বা দায়িত্বপ্রাপ্ত কর্মকর্তাকে, তাহার সিদ্ধান্তের স্বপক্ষে যুক্তি উপস্থাপনের সুযোগ প্রদান করিতে হইবে।

(৯) কোন অভিযোগের বিষয়বস্তুর সহিত তৃতীয় পক্ষ জড়িত থাকিলে তথ্য কমিশন উক্ত তৃতীয় ক্ষকেও বক্তব্য পেশ করিবার সুযোগ প্রদান করিবে।

(১০) উপ-ধারা (১) এর অধীন প্রাপ্ত অভিযোগ তথ্য কমিশন সাধারণভাবে ৪৫ (পঁয়তাল্লিশ) **কাযদিবসের** মধ্যে নিষ্পত্তি করিবে, তবে, ক্ষেত্র বিশেষে, স্বাক্ষীর জবানবন্দী গ্রহণ বা তদন্ত সম্পাদন ইত্যাদি কারণে বর্ধিত সময়ের প্রয়োজন হইলে উক্ত বর্ধিত সময়ের মধ্যে অভিযোগ নিষ্পন্ন করা যাইবেঃ

তবে শর্ত থাকে যে, অভিযোগ নিষ্পত্তির সময়সীমা, বর্ধিত সময়সহ, কোনক্রমেই সর্বমোট ৭৫ (পঁচাত্তর) **কাযদিবসের** অধিক হইবে না।

(১১) এই ধারার অধীন সিদ্ধান্ত গ্রহণের ক্ষেত্রে তথ্য কমিশনের নিম্নরূপ ক্ষমতা থাকিবে, যথাঃ—

(ক) কোন কর্তৃপক্ষ বা, ক্ষেত্রমত, দায়িত্বপ্রাপ্ত কর্মকর্তাকে নিম্নরূপ পদক্ষেপ গ্রহণের জন্য নির্দেশ প্রদান করা যাহা এই আইনের বিধান মোতাবেক গ্রহণ করা প্রয়োজন, যথাঃ—

- (অ) অনুরোধকৃত তথ্য সুনির্দিষ্ট পন্থায় প্রদান;
- (আ) দায়িত্বপ্রাপ্ত কর্মকর্তা নিয়োগ;
- (ই) বিশেষ কোন তথ্য বা বিশেষ ধরনের তথ্যাবলী প্রকাশ;
- (ঈ) তথ্য সংরক্ষণ, ব্যবস্থাপনা ও প্রকাশের ক্ষেত্রে উক্ত কর্তৃপক্ষের পালনীয় পদ্ধতিতে প্রয়োজনীয় পরিবর্তন আনয়ন;
- (উ) কর্তৃপক্ষের কর্মকর্তাদের তথ্য অধিকার বিষয়ক উন্নত প্রশিক্ষণ;
- (ঊ) কোন ক্ষতি বা অন্য কোন প্রকার দুর্ভোগের জন্য ক্ষতিপূরণ প্রদান;
- (খ) এই আইনে বর্ণিত কোন জরিমানা আরোপ করা;
- (গ) কর্তৃপক্ষের সিদ্ধান্ত বহাল রাখা;
- (ঘ) অভিযোগ খারিজ করা;
- (ঙ) কর্তৃপক্ষ কর্তৃক নূতনভাবে তথ্যের শ্রেণীবদ্ধকরণ;
- (চ) তথ্যের প্রকৃতি, শ্রেণীবিন্যাসকরণ, সংরক্ষণ, প্রকাশ ও সরবরাহ সংক্রান্ত ইত্যাদি বিষয়ে এই আইনের আলোকে ব্যাখ্যা প্রদান।
- (১২) এই ধারার অধীন প্রদত্ত তথ্য কমিশনের সিদ্ধান্ত সংশ্লিষ্ট সকল পক্ষের জন্য বাধ্যতামূলক হইবে।
- (১৩) তথ্য কমিশন ইহার সিদ্ধান্ত সংশ্লিষ্ট সকল পক্ষকে লিখিতভাবে অবহিত করিবে। (১৪) তথ্য কমিশন প্রবিধান দ্বারা নির্ধারিত পদ্ধতিতে অভিযোগ নিষ্পত্তির অন্যান্য ব্যবস্থা গ্রহণ করিবে।

২৬। প্রতিনিধিত্ব।—কোন অভিযোগের পক্ষসমূহ তথ্য কমিশনের সামনে ব্যক্তিগতভাবে বা আইনজীবীর মাধ্যমে তাহাদের বক্তব্য উপস্থাপন করিতে পারিবেন।

২৭। জরিমানা, ইত্যাদি।—(১) কোন অভিযোগ নিষ্পত্তির সূত্রে কিংবা অন্য কোনভাবে তথ্য কমিশনের যদি এই মর্মে বিশ্বাস করিবার কারণ থাকে যে, কোন দায়িত্বপ্রাপ্ত কর্মকর্তা, ক্ষেত্রমতে সংশ্লিষ্ট তথ্য প্রদান ইউনিটের প্রশাসনিক প্রধান—

- (ক) কোন যুক্তিগ্রাহ্য কারণ ছাড়াই তথ্য প্রাপ্তির কোন অনুরোধ বা রিভিউ গ্রহণ করিতে অস্বীকার করিয়াছেন;
- (খ) এই আইন দ্বারা নির্ধারিত সময়সীমার মধ্যে অনুরোধকারীকে তথ্য প্রদান করিতে কিংবা এই বিষয়ে সিদ্ধান্ত প্রদান করিতে ব্যর্থ হইয়াছেন;
- (গ) অসদুদ্দেশ্যে তথ্য প্রাপ্তির কোন অনুরোধ বা রিভিউ প্রত্যাখ্যান করিয়াছেন;
- (ঘ) যে তথ্য প্রাপ্তির অনুরোধ করা হইয়াছিল তাহা প্রদান না করিয়া ভুল, অসম্পূর্ণ, বিভ্রান্তিকর বা বিকৃত তথ্য প্রদান করিয়াছেন;
- (ঙ) কোন তথ্য প্রাপ্তির পথে প্রতিবন্ধকতা সৃষ্টি করিয়াছেন—

তাহা হইলে তথ্য কমিশন, দায়িত্বপ্রাপ্ত কর্মকর্তার, ক্ষেত্রমতে সংশ্লিষ্ট তথ্য প্রদান ইউনিটের প্রশাসনিক প্রধানের, উক্তরূপ কার্যের তারিখ হইতে তথ্য সরবরাহের তারিখ পর্যন্ত প্রতি কার্যদিবসের জন্য ২০০(দুইশত) টাকা হারে জরিমানা আরোপ করিতে পারিবে, এবং এইরূপ জরিমানা কোনক্রমেই ২৫,০০০(পঁচিশ হাজার) টাকার অধিক হইবে না।

(২) উপ-ধারা (১) এর অধীন জরিমানা আরোপের পূর্বে তথ্য কমিশন, সংশ্লিষ্ট দায়িত্বপ্রাপ্ত কর্মকর্তাকে, ক্ষেত্রমতে সংশ্লিষ্ট তথ্য প্রদান ইউনিটের প্রশাসনিক প্রধানকে, তাহার বক্তব্য পেশ করিবার সুযোগ প্রদান করিবে।

(৩) তথ্য কমিশন যদি এই মর্মে সন্তুষ্ট হয় যে, নাগরিকের তথ্য প্রাপ্তিতে উপ-ধারা (১) এ বর্ণিত কার্য করিয়া কোন কর্মকর্তা বিঘড়ব সৃষ্টি করিয়াছেন, তাহা হইলে তথ্য কমিশন, প্রযোজ্য ক্ষেত্রে, উপ-ধারা (২) এ উল্লিখিত জরিমানা ছাড়াও সংশ্লিষ্ট কর্মকর্তার এহেন কার্যকে অসদাচরণ গণ্য করিয়া তাহার বিরুদ্ধে বিভাগীয় শাস্তিমূলক কার্যক্রম গ্রহণ করিবার জন্য সংশ্লিষ্ট কর্তৃপক্ষ বরাবরে সুপারিশ করিতে পারিবে এবং এই বিষয়ে গৃহীত সর্বশেষ ব্যবস্থা তথ্য কমিশনকে অবহিত করিবার জন্য উক্ত কর্তৃপক্ষকে অনুরোধ করিতে পারিবে।

(৪) এই ধারার অধীন পরিশোধযোগ্য কোন জরিমানা বা ক্ষতিপূরণ পরিশোধ না হইলে তাহা সংশ্লিষ্ট কর্মকর্তার নিকট হইতে Public Demands Recovery Act, 1908 (Act IX of 1913) এর বিধান অনুযায়ী বকেয়া ভূমি রাজস্ব যে পদ্ধতিতে আদায় করা হয় সেই পদ্ধতিতে আদায়যোগ্য হইবে।

২৮। Limitation Act, 1908 এর প্রয়োগ।—এই আইনের অধীন রিভিউ বা অভিযোগ দায়েরের ক্ষেত্রে Limitation Act, 1908 (Act IX of 1908) এর বিধানাবলী, এই আইনের বিধানাবলী সাপেক্ষে, যতদূর সম্ভব, প্রযোজ্য হইবে।

২৯। মামলা দায়েরের ক্ষেত্রে প্রতিবন্ধকতা।—এই আইনের অধীন কৃত বা কৃত বলিয়া গণ্য কোন কার্য, গৃহীত কোন ব্যবস্থা, প্রদত্ত কোন আদেশ বা নির্দেশের বৈধতা সম্পর্কে, এই আইনে উল্লিখিত রিভিউ কর্তৃপক্ষের নিকট রিভিউ বা, ক্ষেত্রমতে, তথ্য কমিশনের নিকট অভিযোগ দায়ের ব্যতীত, কোন আদালতে কোন প্রশ্ন উত্থাপন করা যাইবে না।

অষ্টম অধ্যায় বিবিধ

৩০। তথ্য কমিশনের বার্ষিক প্রতিবেদন।—(১) প্রতি বৎসরের ৩১ মার্চ এর মধ্যে তথ্য কমিশন উহার পূর্ববর্তী বৎসরের কার্যাবলী সম্পর্কে একটি প্রতিবেদন রাষ্ট্রপতির নিকট পেশ করিবে।

(২) উপ-ধারা (১) এ উল্লিখিত প্রতিবেদনে সংশ্লিষ্ট বৎসরের নিম্নলিখিত তথ্য সন্নিবেশিত থাকিবে, যথাঃ—

- (ক) কর্তৃপক্ষওয়ারী তথ্য সরবরাহের জন্য প্রাপ্ত অনুরোধের সংখ্যা;
- (খ) অনুরোধকারীকে অনুরোধকৃত তথ্য না দেওয়ার সিদ্ধান্তের সংখ্যা এবং এই আইনের যে সকল বিধানের আওতায় উক্ত সিদ্ধান্তগুলি গৃহীত হইয়াছে উহার বিবরণ;
- (গ) দায়িত্বপ্রাপ্ত কর্মকর্তার সিদ্ধান্তের বিরুদ্ধে দায়েরকৃত আপীলের সংখ্যা এবং উক্ত আপীলের ফলাফল;
- (ঘ) কর্তৃপক্ষ কর্তৃক উহার কর্মকর্তার বিরুদ্ধে গৃহীত শাস্তিমূলক ব্যবস্থার বিবরণ;
- (ঙ) কর্তৃপক্ষ কর্তৃক এই আইনের অধীন সংগৃহীত উপযুক্ত মূল্যের পরিমাণ;
- (চ) এই আইনের বিধানাবলী বাস্তবায়নের জন্য কর্তৃপক্ষ কর্তৃক গৃহীত বিভিন্ন কার্যক্রমের বিবরণ;
- (ছ) নাগরিকের তথ্য অধিকার প্রতিষ্ঠার সহিত সম্পৃক্ত বিভিন্ন কর্তৃপক্ষের নিকট হইতে প্রাপ্ত সংস্কার প্রস্তাব;
- (জ) তথ্য কমিশন কর্তৃক প্রাপ্ত অভিযোগের সংখ্যা;

- (ঝ) তথ্য কমিশন কর্তৃক প্রাপ্ত অভিযোগের বিষয়ে গৃহীত ব্যবস্থার বিবরণ;
- (ঞ) তথ্য কমিশন কর্তৃক আরোপিত ও দন্ডপ্রাপ্ত কর্মকর্তার সংখ্যা ও উহার বিবরণ;
- (ট) তথ্য কমিশন কর্তৃক আরোপিত ও আদায়কৃত জরিমানার মোট পরিমাণ;
- (ঠ) তথ্য কমিশন কর্তৃক জারীকৃত নির্দেশনা ও প্রবিধানমালা;
- (ড) তথ্য কমিশনের আয়-ব্যয়ের হিসাব;
- (ঢ) তথ্য কমিশনের বিবেচনায় প্রতিবেদনে অন্তর্ভুক্ত করা প্রয়োজন এইরূপ অন্যান্য আনুষঙ্গিক বিষয়;
- (ণ) এই আইনের বিধানাবলী প্রতিপালনে কোন কর্তৃপক্ষের অনীহা পরিলক্ষিত হইলে উক্ত কর্তৃপক্ষ কর্তৃক প্রয়োজনীয় পদক্ষেপ গ্রহণের জন্য সুনির্দিষ্ট সুপারিশ।

(৩) উপ-ধারা (১) এর অধীন প্রতিবেদন প্রাপ্তির পর রাষ্ট্রপতি উহা জাতীয় সংসদে উপস্থাপনের ব্যবস্থা করিবেন।

(৪) উপ-ধারা (১) এর অধীন রাষ্ট্রপতির নিকট পেশকৃত প্রতিবেদন তথ্য কমিশন বিভিন্ন গণমাধ্যমে ও ওয়েবসাইটে প্রকাশ ও প্রচার করিবে।

(৫) এই ধারার অধীন প্রতিবেদন প্রণয়নের প্রয়োজনে প্রত্যেক কর্তৃপক্ষ তথ্য কমিশনকে প্রয়োজনীয় তথ্যাবলী সরবরাহসহ অন্যান্য আনুষঙ্গিক সহায়তা প্রদান করিবে।

৩১। সরল বিশ্বাসে কৃত কাজকর্ম রক্ষণ।—এই আইন বা তদধীন প্রণীত বিধি বা প্রবিধানের অধীন সরল বিশ্বাসে তথ্য প্রকাশ করা হইয়াছে বা করিবার উদ্দেশ্য ছিল বলিয়া বিবেচিত, কোন কার্যের জন্য কোন ব্যক্তি ক্ষতিগ্রস্ত হইলে তিনি তথ্য কমিশন, প্রধান তথ্য কমিশনার, তথ্য কমিশনারগণ বা তথ্য কমিশনের কোন কর্মকর্তা বা কর্মচারী, বা কর্তৃপক্ষের দায়িত্বপ্রাপ্ত কর্মকর্তা বা অন্য কোন কর্মকর্তা বা কর্মচারীর বিরুদ্ধে কোন দেওয়ানী বা ফৌজদারী মামলা বা অন্য কোন আইনগত কার্যধারা রুজু করা যাইবে না।

৩২। কতিপয় সংস্থা বা প্রতিষ্ঠানের ক্ষেত্রে এই আইন প্রযোজ্য নহে।—(১) এই আইনে যাহা কিছুই থাকুক না কেন, তফসিলে উল্লিখিত রাষ্ট্রীয় নিরাপত্তা ও গোয়েন্দা কার্যে নিয়োজিত সংস্থা বা প্রতিষ্ঠানের ক্ষেত্রে এই আইন প্রযোজ্য হইবে না।

(২) উপ-ধারা (১) এ যাহা কিছুই থাকুক না কেন, উক্ত সংস্থা বা প্রতিষ্ঠানের কোন তথ্য দুর্নীতি বা মানবাধিকার লংঘনের ঘটনার সহিত জড়িত থাকিলে উক্ত ক্ষেত্রে এই ধারা প্রযোজ্য হইবে না।

(৩) উপ-ধারা (২) এ উল্লিখিত তথ্য প্রাপ্তির জন্য কোন অনুরোধ প্রাপ্ত হইলে সংশ্লিষ্ট সংস্থা বা প্রতিষ্ঠান, তথ্য কমিশনের অনুমোদন গ্রহণ করিয়া, অনুরোধ প্রাপ্তির ৩০ (ত্রিশ) কার্যদিবসের মধ্যে অনুরোধকারীকে উক্ত তথ্য প্রদান করিবে।

(৪) তফসিলে উল্লিখিত প্রতিষ্ঠানসমূহের সংখ্যার হ্রাস বা বৃদ্ধির প্রয়োজনে সরকার তথ্য কমিশনের সহিত পরামর্শক্রমে, সময় সময়, সরকারী গেজেটে প্রজ্ঞাপন দ্বারা, উক্ত তফসিল সংশোধন করিতে পারিবে।

৩৩। বিধি প্রণয়ন ক্ষমতা।—এই আইনের উদ্দেশ্য পূরণকল্পে সরকার, তথ্য কমিশনের সহিত পরামর্শক্রমে এবং সরকারী গেজেটে প্রজ্ঞাপন দ্বারা, বিধি প্রণয়ন করিতে পারিবে।

৩৪। প্রবিধান প্রণয়ন ক্ষমতা।—এই আইনের উদ্দেশ্যে পূরণকল্পে তথ্য কমিশন, সরকারের পূর্বনুমোদনক্রমে এবং সরকারী গেজেটে প্রজ্ঞাপন দ্বারা, প্রবিধান প্রণয়ন করিতে পারিবে।

৩৫। অস্পষ্টতা দূরীকরণ।—এই আইনের কোন বিধান কার্যকর করিবার ক্ষেত্রে কোন অস্পষ্টতা দেখা দিলে সরকার, সরকারী গেজেটে প্রজ্ঞাপন দ্বারা, এই আইনের বিধানাবলীর সহিত সঙ্গতিপূর্ণ হওয়া সাপেক্ষে, উক্তরূপ অস্পষ্টতা অপসারণ করিতে পারিবে।

৩৬। মূল পাঠ এবং ইংরেজি পাঠ।—এই আইনের মূল পাঠ বাংলাতে হইবে এবং ইংরেজিতে অনুদিত উহার একটি নির্ভরযোগ্য পাঠ থাকিবেঃ

তবে শর্ত থাকে যে, বাংলা ও ইংরেজি পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।

৩৭। রহিতকরণ ও হেফাজত।—(১) এতদ্বারা তথ্য অধিকার অধ্যাদেশ, ২০০৮ (২০০৮ সনের ৫০ নং অধ্যাদেশ) রহিত করা হইল।

(২) উক্তরূপ রহিতকরণ সত্ত্বেও রহিতকৃত অধ্যাদেশ এর অধীন কৃত কোন কার্য বা গৃহীত কোন ব্যবস্থা এই আইনের অধীন কৃত বা গৃহীত হইয়াছে বলিয়া গণ্য হইবে।

তফসিল

(ধারা ৩২ দ্রষ্টব্য)

সরকার কর্তৃক প্রতিষ্ঠিত রাষ্ট্রীয় নিরাপত্তা ও গোয়েন্দা কার্যে নিয়োজিত সংস্থা বা প্রতিষ্ঠানসমূহ

ক্রমিক নং	সংস্থা বা প্রতিষ্ঠানসমূহ
(১)	(২)
১।	জাতীয় নিরাপত্তা গোয়েন্দা সংস্থা (এনএসআই)।
২।	ডাইরেক্টরেট জেনারেল ফোর্সেস ইনটেলিজেন্স (ডিজিএফআই)।
৩।	প্রতিরক্ষা গোয়েন্দা ইউনিটসমূহ।
৪।	ক্রিমিনাল ইনভেস্টিগেশন ডিপার্টমেন্ট (সিআইডি), বাংলাদেশ পুলিশ।
৫।	স্পেশাল সিকিউরিটি ফোর্স (এসএসএফ)।
৬।	জাতীয় রাজস্ব বোর্ডের গোয়েন্দা সেল।
৭।	স্পেশাল ব্রাঞ্চ, বাংলাদেশ পুলিশ।
৮।	র‍্যাপিড এ্যাকশন ব্যাটালিয়ন (র‍্যাব) এর গোয়েন্দা সেল।